

Maaki

Yagaala tewaanya' Maakiyai yidaavakesira.

Joni bavitaaziya yadei wijiwaakakevinesi.
(Matiyui 3:1-12; Luki 3:1-9,15-17; Joni 1:19-28)

1 ¹Gotiyare Gawaalivaangei Jizaazai Kiraazitiyai gamire yagaala tewaanya mudike' sinnawi yima'na'. ²Gotiyare wi'nawijiwaakakei Piropetiya Azaayai dara dini' Jizaazarina,
“Yithaa, nimore widaasadiyai giminyina waamani'.
‘Gimire tusavi nayaa yadera,’ githiwa.
³Wawinya maayaba ja'maanguraaya' yimani',
‘Naangei batherine tusa' javada'galyilo!
Gamire tusangi yida'na jamakwilo!’”

⁴Sara dinike'na Joni wawinya maayaba mwaalaka sinnawi sagaa' a'mweraavi aalyavi bavitaaziya yada widina “Sarimire simunyabwi mudikebwi yawiramaa'na kyapiji nimi bavitaaziya yihyideinyi. Gotiyai sarimire kayaa'nanyabwi yihimarasinadelyira,” widina Joni. ⁵Sara widina yadaa'nyi “Gaminyawinna wawaaji yagaala sa' kadika wi'naana!” deva Kwaaka Juthiya mwaalyaraji Anga Jeruzaalemi mwaalyaraji yuyara wina. Mi'na wina yeva gamire yagaalya' wi'neva wijalikurakina “Nebulyasira. Nemi kayaa'nanyabwi sana sana yiwosira.” Widina kye' Aalya Jothaniyavi bavitaaziya ya' Joni.

⁶Joni baazi'ma'nya kaameliyavire arilya' yavikarinike' marira'nyina yaka bulimakaawomunnaanya marida mwaalakelyi. Gannya wapaaya baarinnaji aakangire kwarakaji tika nada mwaalakei. ⁷Yagaala da' widina “Nimi biweinyi. Divi pwai bathelyira. Nimore diraginya' wa'di'nyi kiri' gamire diraginya naange' nabaai wavila'na yadesi nimorevi. Naangere kwaari'masivilyavi wila pwiwinike' kwadaai gila'mwi galyaa'mune' nimi naangeinyi mika. Myiwineinyira. ⁸Nimi aalya gavevi

bavitaaziya yihyivanige sa' Naangei Kurya Tewaanyari bavitaaziya yihyadelyira," widina ya'.

Aalyavi Joni Jizaazari bavitaaziya yake'nesi.

(Matiyui 3:13-17; Luki 3:21-22)

⁹Joni sara widadaasiyagaa' Kwaaka Galili Anga Naazaretidaa'nyai Jizaazai bina kya' Aalya Jothaniyavi Joni bavitaaziya yina.
¹⁰Mi'na bavitaaziya yina kya' aalyavi sai bilaawaka yime'nya'bi' dara wanganake' "Sigunya' tivi damujaangika! Kekwai Kuryai kwaamiryaisai daimwaabika!" Mena kada' Kuryai walaabina yaka gamire munyiki kusawi bulamwaaina. ¹¹Bulamwaaina kya' Sigunyavidaasi Gotiyarebadaasi Gotiyai yagaala widina "Saigi, nimire Nyibwaalivaangeiginyi. Kurya tewaanya gukadinyaiginyi. Sahwaigi yilaaya nyigaimanigi," wida'.

Kayaa'nanya'na Saataani Jizaazari widake'nesi.

(Matiyui 4:1-11; Luki 4:1-13)

¹²Yime'nya'bi' Kuryai "A'mwera maayabanna yarai diwo!" jiri'galaasa'. ¹³Jiri'galaasina kya' sahwai kaanna wina kya' yirika a'mweraare sivilatiraai kwavilava' a'mwera maayaba mwaaidisi Saataani "Kayaa'nanyabwi yana!" daka yaamiji yijiwaala'. Yijiwaaina yakegaa' malakayaawaryarana mwaaidapiyaba Jizaazai sarari ye'mwannamwaaina ya'. Sahwai saba mwaalakegaa' Gotiyare mamaayara ejelijara wigaimwanna ye'.

Jawinya maaryaraavi wida' Jizaazai.

(Matiyui 4:12-17; Luki 4:14-15)

¹⁴Dividaa'nyi Jonimi wila yirakina kye' Jizaazai Kwaaka Galilina wilaawina yaka saba Gotiyare yagaala tewaanya' wijiwakamarina.
¹⁵Wijiwakamarina yakegaa' wida' "Dahaa' yemwaalyagaa' aayasira. Dahaa' yunegaa'nanyi. Gotiyai a'mweraavi maremwaaidehaa' yima'niwa' dahaa'. Gotiyarina sarimire simunyabwi mudikebwi jawiramaarila! Yagaala tewaanya' wi'napiji 'Nebulyasira. Sara yaana!' dithinyide'na yihithiwa. Yagaala sa' nayaa dilimwagarila!" wijiwaakina ya'.

(Matiyui 4:18-22)

¹⁶Galili aalibumaangevi sahwai woda'nyi Saaimoniji Saaimonimire gahwaalaangei Ediruyalyi sadaraai jawigilya' aalyavi marasi'na yadaakilyi wangamabina ya'. Marasi'nagile' dare'nesi. Jawinya mwagi'nagilyaraalyi. ¹⁷Wangamabina yaka wida' "Dinyimidinaabyila! Kanyimidinaabakilyi kihiziwaaka'muri jawinya maa'ditabaabi' Gotiyarine a'mweraavi maarya'neraaihiri yihimwaaihideraaihilyira."

18 Mi'na kuda' yime'nya'bi' kirinnya jawigilya yagalya'ma'na yagila midinna yagi. 19 Midinna kyagi Jizaazai pizi'gwa wawaka Sevathiyare gawaali' kwaraai Jemizalyi Joniji sadaraai wanganakeraai sipiyavi mwaalagila jawigilya kayaaka yinike bi'nyina yagi. 20 Bi'nadaakilyi yime'nya'bi' jaka widina kya' "Yarai dulaabila!" kirinimaangei Sevathiyalyi gannya nigwiwawinyarari sipiyavi mwaalesaraavi yagalya'ma'na yagila kidaraai gaminyi midinna yagi.

Jizaazai yimakeri marasi'na'.

(Luki 4:31-37)

21 Kumi sara angeba Kaapaniyamina wina kye' Juyaraavire Kwazaakegaa' yima'nyina kya' yime'nya'bi' gami Juyaraavire Lotuangevi wilina yaka Gotiyare yagaala wijiwaakina. 22 Wijiwaakina kya' yuyara gamire yagaalya' wi'neva atika maru'na'muluna ye'. "Kiwijaraavirebwi kwaasi kwaasiya'bisabulyi. Jizaazai gannya simunyavi yuya yawi'nikelyi," didaapi atika maru'na'na ye'. Sare' dare'nanyi. Jizaazai diragina kininnakei wijiwaakake'nanyi.

23 Yime'nya'bi' a'mwei yimaka widei Lotuangevi wilina yaka 24 jaka danganna "Jizaazai Naazareti mwaalyaigi, neminyi beri' dineyide'na bahineka? Nemi aa'neinaavi kayaaka dineyigaide'na daaka? Giminyina yawi'mwa. Gotiyare tewaanyaiginyina yawi'mwa." 25 Mi'na jaka kada' Jizaazai maanga widina "Yagaala madinnera! A'mwe saridaasi diwona!" 26 Sara kuda' yimakei a'mweri yikilaaka wilaka jaka naanga daka kaanna wina ya'. 27 A'mwera yuyara tinna wanganeva atika maru'nakulina yadivi' kumi sara dine' "Ai, da' berivaka? Wijiwaakya'ne' mudikesi. A'mwe sai yagaala diragina widivanikelyi. Nabaai yimakeraavi sara widiwake sara yivanigava!" 28 Kadine' yime'nya'bi' Galili yuyabanyara Jizaazai yake'na maalikageaa' wi'nyina ye'.

Jizaazai a'mweraavi tewaanya ya'.

(Matiyui 8:14-15; Luki 4:38-39)

29 Yime'nya'bi' Jizaazai Lotuangevidaa'nyai bwalyuna kya' Jizaazalyi Jemizalyi Joniji pwaraji sara kaanna wina yeva Saaimoniji Ediruyalyi saraare angevi bwina ye'. 30 Bwina kye' midika wida'daasi Saaimonimi ganyaalimaange' wa'disi yime'nya'bi' kumi Jizaazari widina. 31 Mi'na widina kye' nabalinakeyabanna bina yaka maradihaa'bwa'na ya'. Jizaazai sara kya' nabalya' mena yiwina kya' a'mwe' kuminyine wapaaya yovirawakina ya'.

(Matiyui 8:16-17; Luki 4:40-41)

32 Nyilyai mena walakyagaa' sabanyara nabalina'kengiji yimaka widivisangiji sangi gaminyawinna makuna ye'. 33 Makuna yeva saba

mwaalyara yuyara tikuryaba davaabina ye! ³⁴Davaabina kye! Jizaazai a'mwe nabalya ge ge wa'divisaraavi nabalya' wangadaa'nyi "Tewaanya jima'nana!" sana sana kuda! tewaanya yima'nigulina ye! Nabaai aa'ne kwalaalyaraavi widaasina ya! Aa'nera gaminyina yawi'daapiya'na wangada "Yagaala madipinera! Kwaasi yadivisaihiri nayihu'nipidika!" widaka widaasina ya!

Kwaaka Galili Jizaazai wijiwaaka'.

(Luki 4:42-44)

³⁵Jizaazai se wa'mwarakei yirikunyagaa' dikaa'na yaka walyuna yaka a'mwera maaya kunebanna kaanna wina yaka Gotiyari yagaala widina. ³⁶Kuna widina yadaa'nyi Saimoniji gaminyaba mwaalesaraji biribirikaanyara wina yeva ³⁷yiri'maa'na yeva wide! "Yuyara giminyina biramarivanigava a'mweraava." ³⁸Tivi'na kude' gami widina "Angeba pini aya kibanna nemi kaanyaana! Anga saba Gotiyare yagaala wijiwaakide'na bwalyuwa." ³⁹Widaka Galili yuyaba kumire Lotuangengi yagaala Gotiyare wijiwakamarya! Sagaa' a'mwe yimaka wividivisaraavidaasa yimakeraavi widaasa'.

Samatanakei tewaanya yima'na'.

(Matiyui 8:1-4; Luki 5:12-16)

⁴⁰A'mwe samatanakei gaminyawinna bina yaka "Jizaazai naangelyi," daka kwadaai gilina yaka yagaala naanga diraginna wida! "Nimire kilaakeji! 'Tewaanya mwaalana! nyawi'diza' gimi sara dinyavada'gala! Sara yinneiginyi gimi." ⁴¹Widina kya! Jizaazai kale kwia' ata dathiwanna yaka widina " 'Sara yima!' yawi'manige. Gimire kilaakeji! yihula dana!" ⁴²Widina kya! yime'nya'bi' samate sa' ya'ma'na yaka gamire kilaakejiki yarai yiwina ya! ⁴³Kilaakejiki yiwina kya! Jizaazai maanga widina yaka ⁴⁴widina "Nayaa dinyu'nana! (Niminyina naji'bwa'nemwaaibithika!) A'mwe aane pwai kwari 'Sara nyiwaka,' mudinna! Aane piri' kiri' mujiwaakinna! Aawa. Kaanna wawa'gizi sipizipiya Gotiyarina mubithika yira'deri piriziyari duziwaainana! Dahaa' kilaake' tewaanya warike'na Mozizai dinike' Gotiyarine' dumaaride'na a'mwera yawi'na 'A'mwere samate' menanyira,' gyawipi'dera." Mi'na widaka yime'nya'bi' widaasina ya! ⁴⁵Sara kudaasa' a'mwei walyuna yaka yuyaba yagaala sa' wijiwaakya'nei yuyaraavi wividivainadaa'na yikwaasa! Gami sara kya! "A'mwera nyanganapiji niminyina nanyidahidiwagamaremwaaibithika!" daka Jizaazai angeba mwiyai yaayeba mwaalina yadisi gazabazabadaa'nyi gaminyawinna yikabina ye!

Jizaazai yaginya bainikeri yidikavamwaaaha'.

(Matiyui 9:1-8; Luki 5:17-26)

2 ¹Sawita pijaa' kajinna' sai Kaapaniyamina ayina yagalaawaka bamwaaina ya! Bamwaaidi'nyi dara wi'nesa! "Anga aya mwaaidevi

damwaali!" ² Sara deva kwala yi'bwa'nyina ye!. Kwala yi'bwa'nyina yeva tikuryaba daavanneba kune piba madaayi yeva angavine! mwasabanne! bamwaihwodapi yagaalya' wijiwaakina ya'. ³ Wijiwakadaa'nyi pwara makabina kye! a'mwe daraai daraalyara kilaaka yaginya bainikeri marikwavamakabina ye!. ⁴ Marikwa'na yeva "A'mwe kwalaalyara damwaaahava!" deva kwala bwa'naanyavine'na Jizaazaryawinna mabamakulyara angevi a'ba bamaraga'nigilaawina yina yeva munyaba Jizaazai wilamwaaidisiyaba kwavisa' daburaabina yeva yaginya bainikeri yi'binnakeri marala'mwagakina ye!. ⁵ Marala'mwagakina kye' Jizaazai kumire limwangebwi yawiranganna "A'mwe dara 'Jizaazai diraginaangei a'mweri tewaanya negaimwagathelyira,' yawireva makabiwaava," Jizaazai yawiraka yaginya bainikeri widina "Nyibwaali', gimire kayaa'nanya gimarasi'mwa." ⁶ Sara widina kya' Kijijara pwara saba mwaaleva kumire kunya yawi'na ⁷ "A'mwe dai yagaala sa' baa'na divanika! 'Gotiyari wavila'mweinyi,' dathivanika! Kayaa'nanya aai marasi'nadelaka! Gotiyai gavei marasi'nadelyira. Sare' Gotiyari yagaabiraizika diwakei daaka!" yawiranganna ye!. ⁸ Yawirangadaapi yime'nya'bi' Jizaazai gannya simunyavi yawi'na "A'mwe dara sara jawi'manigava!" daka widina "Sarimire simunyangi sare' baa'na yawi'manigava!" ⁹ Darewaai naangewaai midaaka! Piri' dare!. Yaginya bainikeri widide! 'Gimire kayaa'nanya gimarasi'mwa.' Piri' dare!. Widide! 'Dithikaaka! Yi'binya' maara'gizi dimakwalyona!' Yagaala yuya sawaai naangewaai midaaka! Nimi kuda'muri 'Dithikaaka! Yi'binya' maara'gizi dimakwalyona!' sara yade'na ¹⁰ sarimi yawi'na 'Ai, Kwaaka davaki a'mwe sai kayaa'nanya marasi'nya'nei diraginnakelyi,' jawiryideihilyi. Sara jawiryide'na A'mweraavine Kaimiraayai yaginya bainikeri sara widana!" ¹¹ A'mweri widina "Githiwa, 'Dithikaaka! Ginnya yi'binya' marikwava'gizi ginnya angevina dimakwalyona!' " ¹² Sara widina kya' daavaka yime'nya'bi' yi'binya' marikwa'na yaka kaanya walyodaa'nyi sare'na a'mwe yuyara tinna wanganna yeva atika maru'nakulina yeva Gotiyari yilaaya yeva "Sabwi nemi sara mwanganyainera," dinyina ye!.

Jizaazai Livaayari wida' "Nyimidinaama!"

(Matiyui 9:9-13; Luki 5:27-32)

¹³ Jizaazai ayina walyoka aalibumaangevi mwaaidisi a'mwera yuyara yi'bwa'nyina yeva mwaaidapi Jizaazai wijiwaakina ya!.

¹⁴ Livaayai Alipiyazareai taakiziya maa'dei taakiziya maa'deva mwaaidi'nyi Jizaazai wangamabaka widina "Nyimidinaama!" Mi'na widina kya' daavina yaka mijiwina ya!.

¹⁵ Livaayare angevi Jizaazai namwaaidisi taakiziya maa'divisarari a'mwe kiwinya maali'na yadivisarari sara Jizaazalyi gamirerari saraayaba mwaalina ye!. Sare' dare'nesi. Kumi sara kwalaalyara gaminyi

midinesara. ¹⁶Namwaaidapi Kiwijara Periziyara “Gami salyi kiwinya maali'na yadivisarari taakiziya maa'divisarari je'mwannanivanigava!” deva gamireraavi widina “Taakiziya maa'divisaraji kiwinya maali'na wiyadivisaraji saraayaba baa'na nivanika!” widina. ¹⁷Yagaala sa' widina kye' Jizaazai wi'nakei widina “Dotarina nabalimaayara wigainadera mi'. Aawa. Nabalinakera wigainadere. Sare'na nimi sainyi a'mwe yida'mar aangebuliyainajiyaraavi jivwaramaarya'neinyi mabye. Aawa. Kiwinya maali'na yadivisaraavine'nanyi.”

Wapaaya manya'nesira.

(Matiyui 9:14-17; Luki 5:33-39)

¹⁸Pigaa' Jonimireraji Periziyaraji “Gotiyarina wapaaya manaannera!” deva navika mwaaidapi pwara wilaabina yeva Jizaazari widina “Be'neka? Jonimirerari Periziyaraavirerari sara wapaaya manyara mwaalina yadapi kiri' gimirera wapaaya baa'na nivanigava!” ¹⁹Widina kye' Jizaazai widina ya' “Mudikangeyabanne munne yadivisagaa' a'mwe' maarade miginyai mwaaidozi a'mwe a'mwera tika munne manipine yipijara daaka! ²⁰Miginyai mwaaidoriyagaa' wapaa nipi'dengira. Pigasa kima'noji kuminyabadaasai a'mwe' maarade miginyai yipalasi'na kyapi sagaa' kumi sa wapaa tika manyi yipi'dengira. Sare' kanyipalasi'napiri nimirera wapaaya manyi yipi'dengira.”

²¹Sare' Jizaazai gamire yagaala mudike'na widina “Yivita gaalya' a'mwe pwai dakuroji 'Yivita ayiki miwirima!' myawiryajai tewaanyalyira. Sara miwi'na yaji kwaji miwita'ne yivita yivisiki kayaaka kyadika! Yivita gaalyamili' yivita ayiki kayaaka yade'na naanga lihi'na yadesira. ²²Nabaai memekilaaka waainitalya' a'mwe aane pwai kwai waainitala ayavi waainiya gaalya' mamaradingiki yadelyi. Sara maradingikaja' aalimaagwala bilamari'bwarakadaawori waainiya' memekilaakevi kayaaka kyoji waainiya' bwalaraawina yadesira kilaaka yuya ti'miwirojiya. Sare' aawa. Waainiya gaalya' memekilaaka mudikevi maradingikina yaja' tewaanya warina yadesira.”

Juyaraavire Kwazaakegaa'.

(Matiyui 12:1-8; Luki 6:1-5)

²³Juyaraavire Kwazaaka pigaa' lilaajabita witiziwawinyavi tinnyaba tusavi sai widavadaasi gamirera midinaabina, mijika wiadaa'nyi witizila gimujina ye'. Sa'na kiwinya dinike' “Kwaakaanya yamaryadi' tusavi a'mwera witizila maapika!” dinikesira. ²⁴Gimujina kye' Periziyara Jizaazari widina “Yithaa, Kwazaakegaa' dahaa' baa'na gimujivanigava! Kiwinya sare'na warikesira. Sa pigaa' dihimujidengira. Kwazaakegaa' mipinera sabwi!” ²⁵Sara widina kye' Jizaazai widina “Baa'na nyidiwaava! Ne Deviti yaake pikariyikwiavi tinna mwanganyadivisaihi

daaka? Devitiji gamijiyaraji sara wapaaya kunera mijika wiadaa'nyi ²⁶sipizipiya Gotiyarina Yira'de Naangei Avaayathai mwalyaakegaa' Deviti Gotiyarina yira'de pwari girikulya'na widaka Gotiyare Angevi wilaabina kyaa' Gotiyai tinna wanganya'ne girikula wakyaa'na kujayaa' maranyina yaa'. Girikula sa mi'na kwaryaa' 'Gotiyare yira'de'wisara gavera maranadivisarera,' kiwinya' sara dinikesira. Deviti Gotiyarina yira'dei mamwalyaakei maranyina yaka nabaai gamijiyaraavina wimaryaa'. Sare' Gotiyai maiyagaala mujaa'." ²⁷Sara widaka widina ya' "Sinnawi Gotiyai a'mweraavi yavikaryaka dividaasi a'mweraavine'na Kwazaakegaa' wakyaa'. Sinnawi Kwazaakegaa' mwaryaka dividaasi Kwazaakegaa'ne'na a'mweraavi myavikaryaa'. Arikewi. ²⁸Sara yaake'na A'mweraavine Kaimiraayai Kwazaakegaa'ne Naangei 'A'mwera sara sara yipi'derera,' widadelyira," wida' Jizaazai gaminyine'na.

**Kwazaakegaa' Jizaazai pware ata kayaa'nanya' nayaa yavada'gala'.
(Matiyui 12:9-14; Luki 6:6-11)**

3 ¹Lotuangevi ata pimagingini yaalika mena yinikei mwaaidi'nyi Jizaazai ayina wilamwaaina. ²Wilamwaaina kya' "Jizaazai Kwazaakegaa' a'mwere asa' tewaanya yavada'gaina yajiwaka?" deva A'mwe Periziyara bangana'na ye'. "Asa' tewaanya yavada'gaina yaja' nemi kotiya wimwaaihina yaadeinaava," deva bangana'na ye'. ³Nayaa bangana'na yadapi Jizaazai ata kayaa'nanyari widina "Tinnyabanna dithaaka!" ⁴A'mweraavi widina "Kwazaakegaa'na kiwinya gara divanika? Kwazaakegaa'na tewaanya yija'nebwi sara dathivanika? Kwazaakegaa'na kayaa'nanya yija'nebwi sara dathivanika? Nabaai 'A'mweraavi tewaanya mwaabi'de'na dihaimwana!' dathivanika? 'A'mweraavi diramakya' kiwinya sara dathivanika?" widina. Sara widina kya' kumi sara yagaala muji, maadonna mwaalina ye'. ⁵Maadonna mwaalina kye' kumire simunyangi ata yaalika yinikerina kuminyi kale mwiadaa'nyi Jizaazai wangamabina. Wangamabina kya' saraavine'na kale wiadaasi avaalayagaa' maadonna mwaaidapiyaraavina gamire sinna tika wida'daasi a'mweri widina "Ginnya asa' jiwibwaka!" Sara widina kya' ata yina kya' ata kayaa'nanya' maamidarya' yima'nyina. ⁶Maamidarya' yima'nyina kya' yime'nya'bi' Lotuangevi Periziyara bwalyuna yeva Erotiyareraji yi'bwa'nyina kye' jamungaje' "Jizaazai balade'na nemi gara yaadelaka?"

Kwala bwa'naanya aalibumaangebaari mwaale'.

⁷Jizaazalyi gamireraji saba yagalya'ma'na yeva Aalibunya Galilina wina. Nabaai kwala naanga kaanna wina. Kwaaka Galili mwaalyaraji Kwaaka Juthiya mwaalyaraji ⁸Anga Jeruzaalemi mwaalyaraji Kwaaka Yithumiya mwaalyaraji Aalya Jothani pimagi mwaalyaraji Anga Taayaa Anga Saaithoni sabanyaai mwaalyaraji yuya sara "Jizaazai sana sana

yivanikelyira,” deva gaminyawinna kaanna bina. ⁹Kaanna bina kye' kwala bwa'naanya naange'na gamireraavi widina “Kwala bwa'naanya da' bule nanyinadika! Botiya' niminyine' jovirawakyila! Aalyavi wa'di'nyi botiyavidaa'nyi wijiwaakideinyi.” ¹⁰Sare' dare'nesi. Sara widina yake'ne! Jizaazai a'mweraavi tewaanya yavada'gaina kya' nalaavinakera “Jizaazari yimetavima!” dineva yimeta'na yesa'na widina ya'. ¹¹A'mwe pwara yimaka widivisara Jizaazari tinna wanganeva gaminyawi wala'na yeva “Aakayi,” jaka dina “Gotiyare Gawaalivaangeiginyira,” widina. ¹²Sara widina kye' Jizaazai yimakeraavi yagaala diragininaanga widina “Niminyina ‘Gotiyare Gawaalivaangelyi,’ madipinera!”

Jizaazai a'mwe atiraai sivilyiridaa'nyi pwaraalyaraavi dahilaka'.
(Matiyui 10:1-4; Luki 6:12-16)

¹³Jizaazai mugunyangi wilaawina yaka “A'mwera nimirera yima'nipi'dera,” dakeraavi jaka widina kya' kumi wilaabina ye'. ¹⁴Wilaabina kye' a'mwe atiraai sivilyiridaa'nyi pwaraalyaraavi dahilakina yaka “Niminyaba dimwaalyila! Nabaai yagaala wijiwakamarya'na yihithaasidera! ¹⁵Yimakeraavi widaasa'ne diraginya' yihizaavideinyi,” widina ya'. ¹⁶A'mwe atiraai sivilyiridaa'nyi pwaraala sareraavine yaya darengira. Yi pwai Saaimoni yaya piri' Jizaazai widake' Pitai, ¹⁷yi pwaraai Jemizai Sevathiyare gawaalivaangelyi Joni Jemizare gahwaalaangelyi sadaraai yaya piri' widake Bawanezizi (aangyagaalya'na Yi'muyagaainakeraai), ¹⁸yi pwai Ediruyai, pwai Pilipi, pwai Baatolomyui, pwai Matiyui, pwai Tomaazai, pwai Jemizai Alipiyaazarei, pwai Tathiyazai, pwai Saaimoni “Kumireba Romiyara wipika!” dadei, ¹⁹pwai Juthaazai Yizikeriyotiyai dividaasi Jizaazari yikamaangeraavina wibwaridaakwia'nei.

“Jizaazalyi Biyelizivuliji saraai yivanigi,” wide' Periziyara.
(Matiyui 12:24-32; Luki 11:14-23; 12:10)

²⁰Jizaazai gannya angevi wilaabina. Mi'na wilaabina kya' kwala bwa'naanya yi'bwa'namwaaina kye' Jizaazalyi gamireraji sara yina yina yeva “Wapaaya warana! Gotiyare wawinya yaana!” deva wapaaya manyi ye'. ²¹Wapaaya manyi kye' Jizaazai yake'na gamire jilikaimiraaya sara wi'neva “Nemi gaminyi marawaana!” deva kaanna bina ye'. Sare' dare'nesi. “Simunya maayai mwaalika,” desa'nanyi.

²²Kiwijara Anga Jeruzaalemidaasara dina “Jizaazari munyiki yimaka Biyelizivuli kininnakelyira.” Nabaai dina “Yimakeraavi maremwaala naangei gannya diraginya' kujaava' Jizaazai yimakeraavi widaasina yadelyi.” ²³Sara dina kye' Jizaazai a'mweraavi “Kaajila!” widaka ke'ba'na yagaala widina “Saataani Saataanimi gara yoji widaasinannelaka?” ²⁴Kingiyare a'mwera anga kiba mwaalyara jaapaina yipija' mala

bwa'nyina yipija' sahwara diraginya daapine' mika! ²⁵A'mwe pinidaka kajapalemwalamaryapiji sanidaka diraginya daapine' mika! ²⁶Savine'na Saataaniji gamireraji jaapaina yipija' mala bwa'nyina kyapiji Saataani maremwaaideva diraginya madaayi yannesi. Aawa. Savine'na Saataani mi'nanyi. ²⁷A'mwe aane pwai kwai a'mwe diraginyare gilyivisa kuka yipalamaasa'na gamire angevi mulaawi yannelyi. Arikewinyira. Sinnawi sai a'mwe diraginyari wila pwiwaja' divi kuka yipalamaaradelyira. ²⁸Yagaala da' jawika! Nebwina githima! A'mwera kayaa'nanyabwi yivanigasabwi sabulyi Gotiyarina yagaabiraizika ge ge diza yivanigasaji yivanigasara Gotiyari kudapiji Gotiyai kayaa'nanya sa wimarasinadelyira. ²⁹Sare kiri' Kuryai Tewaanyarina yagaabiraizika widivanigasa yuyagaa' Gotiyai mumarasi'nyi yadelyira. Aawa. Kurya Tewaanyarina birala sabwina yiwetawakya sabwi yuyagaa' yuyagaa' waragothevulyira. Sabwi Gotiyai mamarasi'nyi yadelyira!" widina ya'. ³⁰Jizaazarina "Yimakei kininnakelyi. Gotiyare Kuryai kininnakei mika," dinesa'na Jizaazai sara wida'.

Jizaazari ganaangesi gahwaalaangeraji wilaabe'.

(Matiyui 12:46-50; Luki 8:19-21)

³¹Sagaa' Jizaazari ganaangesi gahwaalaangeraji bi'ma'na. Mi'na bi'ma'na yeva angevi mwasawi daaveva gaminyina pwaraavi widina " 'Gimijiyaraji gwaangesi mwaaihava,' duthaawila!" ³²Sara widina kye' kwala bwa'naanya' gaminyaba wilamwaaleva widina "Yithaa! Gwaangesi ja'mweraji ja'mweji sa mwasaba bamwaaleva giminyina jaka divaniga!" ³³Jizaazai wi'naka ma'maa'na "Ninnya niwaa' berivaka? Nyigwaalaangera bewaraavaka?" ³⁴Widaka gaminyaba bamwaihwodapiyangi tinna wanganaka widina "Yithaanyi! Dathara niwaasi nyigwaalaangeraji mwaaiha'. ³⁵A'mwe pwara kwara Gotiyai widinike' sara yivanigasara sahwara niwaasi nyigwaalaangeraji nyinyaabulaangeji mwaaihava."

Witizila piraihirakakesira.

(Matiyui 13:1-9; Luki 8:4-8)

4 ¹Pigaa' Jizaazai aalibumaangebaari gaai wijiwaakina. Wijiwaakina yadaasi kwala ya' bwa'nemwaalesa'na sipiyavi wilamwaaina kya' sipiya' aalyavi a'ba yila'na yadisi kwala bwa'naanya yuya aalibumaangebaari mwaalina. ²Sara mwaalina yadapi Jizaazai wijiwaakya kwalaalya kuminyine'na yagaala ke'ba'na widina ya' ³"Dinyu'nyila! Yithaanyi, pigaa' a'mwe witizila piraihirakya'nei kaanna wina ya'. ⁴Wawaka gannya wawinyavi sila kaviraihiraka' sila pini tu'maangeba bwalaraawina kya' yusara bamaranyina ye'. ⁵Piba amwi sila naangeji' wa'di'nyi a'ba kwaaka maalikeji' wa'di'nyiyaba

sila pini piraihirakake witzila yarai yiri'na ya'. ⁶Yiri'na kya' gannya miwirinya naanga magiri kya' nyila naanga widina yakegaea' yawaka baihininya yaka yuya balina ya'. ⁷Kwaakevi lannake wa'disi a'ba sila pini piraihirakake yiri'na kya' lannake kiniji yiri'na yaka naanga girina yaka kayaaka galadathiwanna kya' kurijirika dina yaka gamire sila mi'nyi ya'. ⁸Sila pini kwaaka tewaanyavi kaviraihiraka' sila sa tewaanya yiri'na yaka naanga girina, sila tewaanya yi'nyina ya'. Yi'nyina yake pini sila pirividaa'nyi kibawe (30) yi'nyina ya'. Sila pini sila pirividaa'nyi naanga kibawe (60) yi'nyina ya'. Sila pini sila pirividaa'nyi naanga (100) yi'nyina ya' sara widina ya' Jizaazai. ⁹Yagaala ke'ba'na mi'na widaka Jizaazai widina ya' "Kadi'nakeinyi daakaji nayaa dinyu'nana!"

Yagaala ke'ba'na widakebwinesi.

(Matiyui 13:10-17; Luki 8:9-10)

¹⁰A'mwe kwala bwa'naanya mena wina yesagaa' Jizaazare atiraai yaka sivilyiridaasi pwarai saraji a'mwera gamiji mwaaidivisaraji sa Jizaazari yiwaara'na "Yagaala ke'ba'na diwaanya' dinejiwaakya!" ¹¹Sara yiwaara'na kye' Jizaazai widina "Yagaala nebulya' yoimavajalikurakya' Gotiyai maremwaaide'ne' Gotiyai yihiziwaainiwaka. A'mwe pwara mwasilaanyara yagaala yuya ke'ba'nanya gave pirivina wi'nivaniga'. ¹²Sa'na yima'nya'ne' dinikesira.

Tinna sara wangadivi' kiri' simunya myawiranganyivaniga'.

Kadika sara wi'nadivi' kiri' simunya myawiramaarivaniga'.

Yawirapiji mudikebwi yawiramaapiji kwaji

Gotiyai kumire kayaa'nanyabwi kamarasi'nadika!

Yagaala piraihirakake'na Jizaazai wijiwaaka'.

(Matiyui 13:18-23; Luki 8:11-15)

¹³Sai widina "Yagaala ke'ba'nanya sa' myawiryijiwaava? Yagaala sa' myawiri yeva yagaala ke'ba'nanya pini gara jawiryideihilaka? ¹⁴A'mwei yihithiwei yisila piraihirakakei Gotiyare yagaala wijiwaakadelyira. ¹⁵Sila pini tu'maangevi piraihirakake bwalaraawina kya' yusara maranyina yeta pwara Gotiyare yagaala ku'napiji yime'nya'bi' Saataani yarai bina yoji yagaala wi'nipija' yarai marasi'na yadengira. ¹⁶Sila amwi wa'disi kwaaka maalikejiki yisila piraihirakake pwara sabaabi' Gotiyare yagaala yime'nya'bi' yilaaya'na wi'nyina yapiji ¹⁷kumi sara diraginya' kininnakera mamwaalyi. Aawa. Divi maalikegaea' a'mwera Gotiyare yagaalya'na maanga widina, taanginya wina kyapiji yime'nya'bi' Gotiyarina yagalya'ma'na yipi'dengira. ¹⁸Kwaakevi lannake wa'disi sila pini piraihirakake pwara Gotiyare yagaala nayaa wi'nyina yipi'dengira. ¹⁹A'mwe sara Kwaaka davakina yawi'na, nigwilalaakenna yawi'na, gilyivita naangenna yawi'divisara sara yipi'de'na Gotiyare yagaalya'

kayaaka galadathiwanna kyoji a'mwera navika mwaaijara Gotiyare yagaala navika yipi'dere waryaanyara. ²⁰Kwaaka tewaanyavi sila pini piraihirakake pwara Gotiyare yagaala nayaa wi'nyina, daapina yipi'dengira. A'mwe sara Gotiyarine tewaanya yipi'derera. Pwara tewaanya kibawe (30) yipi'de, pwara tewaanya naanga kibawe (60) yipi'de. Pwara tewaanya naanga (100) yipi'desira.”

Laamuyai maa'gulyavi marayulyakina yinike'nesi.

(Luki 8:16-18)

²¹Saga' sai widina “A'mwe pwai laamuyai maa'gulya' mariri'mwagakinkeriki lika marulyakadei daaka! Nabaai se warya'ne yi'binya dalaangevi laamuyai lika marulyakadei daaka! Aawa. Yi'binyavi yilakade'nesira. ²²Sare' dare'nesi. Nimire yagaala aane piri' kiri' lika yulya'nike' divi nayaa yibwaridaakwadesi. Dahaa' wijiwaakiyagaala widadinya aane piri' kiri' bwakakinike' a'mwera myawirivanigasa' 'Divi ku'maayaba yima'naabana!' dena bwakake'nanyi. ²³Kadi'nakeinyi daakaji nayaa du'nana!” ²⁴Jizaazai widina “Kadika wi'nivanigasa' nayaa jawirila! Yawibwasa' diriviki'de' sa' girivikiradesi. Nabaai piri' gye'mwagahizaavadesi. ²⁵Sare' dara yihithivanige. A'mwe pwai 'Jizaazare yagaala waburya nyiwaka! Wi'nima!' kadozi Gotiyai yagaala pini wijiwaakadelyira. Pwai 'Jizaazare yagaalya taanga nyiwaka. Waramaryana!' dazai Gotiyare yagaalya myawiri yajai nimire yagaalya' wasi'najari Gotiyai yagaala pini mujiwaaki yadelyira.”

Wijiwaakiyagaala sila yirita'nesi.

²⁶Yagaala piri' widina “Gotiyai a'mweraavi maremwaaide' naanga yima'nya'ne'na daresi. A'mwei wawinyavi sila piraihirakadevaabisasi. ²⁷Piraihirakadevi a'mwei sawisavi se wa'da yirika pu'daasiyavi dika'na yada navika mwaaidi'nyi sila piraihirakadengidaa'nyi bilyiri'na. Bilyiri'na yadevi naanga sara bilyiri'daa'nyiya'na myawiri. ²⁸Kwaaka gami savidaasi yilaabina. Sinnawi witiya maalike bilyiri'na, divi purirya yi'nyina, divi sila yawaka yina yadesi. ²⁹A'mwei dara wangade' 'Yawaka mi'na yiwake' daaka!' dada yime'nya'bi' kwaari'mata yadi'mwagakinikesi marawidilavamaa'na yade sila maaryagaa'nanyi. Gotiyai a'mweraavi maremwaaide' naanga yima'nya'ne'na sahirisira. Sare'na a'mwera myawiryarera.”

Wijiwaakiyagaala maaziteti silyanna.

(Matiyui 13:31-35; Luki 13:18-19)

³⁰Jizaazai widina “Gotiyai a'mweraavi maremwaaide'na be yagaala yihiziwaakijiwana? Sa'na ke'ba'nanya berivi wakaadevaka?
³¹Darebaabisasi. Gotiyai maremwaaide' sinnawi maalika warina,

divi naanga yima'nya'ne'na yisi' maaziteti wo'nikikine sila maaziteti maalikesira. Yuya pini Kwaakevaki naangengira. Yisi' maaziteti aranya naange'bisikira. ³²Yisila maalika sa' pwai kwaakevi maraburinna yada yisila maalitaayamilikidaa'nyi yisi' yiri'na yada naanga girina yada sigya naange' waayadi'nyi yutara sigunyaviyara gamire taanyangi arita yilyalaanna yadivi' kima'nyawi mwaaidivisare. Gotiyai maremwaaide' sahirisira.” ³³Jizaazai yawi'na “Kumire yawisa navila'mudika! Nayaa yawipinebaabi' wijiwaakima!” daka ke'ba'nanya kwalaalyangi gamire yagaala widina. ³⁴Widina yakevi a'mweraavi ke'ba'nanyanna widina. Kiri' kima'nyawi gannya gaveraavi aangyagaala nayaa wijiwaakina ya'.

Jizaazai yihuta naange' widaasa'.

(Matiyui 8:23-27; Luki 8:22-25)

³⁵Yirika savi nyila kabwalaawa' aalibumaangevi Jizaazai gamireraavi widina “Aalibunya davi kengihiri ga'makwawaana!” ³⁶Widina kya' kwala naangengi yagalya'ma'na yeva gamirera sipiyavi Jizaazai wilamwaaidi'nyiyavi wilamwaaina kye' gami kwariji makuna ya'. Nabaai sipiya pini aalyavi yilarake wina ye'. ³⁷Kaanna kaanna wodaapi yihu'maanarya' kya' aalimavajinaaka sipiyavi yilawiresi'naabina kya' sipiyavi aalya buladi'nyina ya'. Aalya naange' buladi'nyina kya' gamirera dara wanganesa' “O, we', nemi balaajiwona!” ³⁸Deva Jizaazai sipiyavi likimagi mwaalakei dihahisavi se warakeri. Deva dithikavimwaaihina yeva yarai widina “Aaka, Nejiwaakadinyaigi, nemi yarai nyiwawaadika! Neminyina ‘Nabaipika!’ myawirijivanigi?” ³⁹Sara widina kye' Jizaazai dikaa'na yaka yihusavi maanga widaka “Mi'nanyira,” aalyavi widina “Aalya'gi jaka madinna! Kave warina ja!” Widina yakevi yihu'maanarya' mi'na muda'na kya' aalya' kave warina ya'. ⁴⁰Aalya' kave warina kya' Jizaazai widina “Lika baa'na yivaniga! Gotiyari malimwagyivaniga' lika yiwaasa!” ⁴¹Gamirera sara wanganeva lika naanga yeva dine' “Yihusasi aalyasi sawaai gamire yagaalya' wi'niwaalya' be a'mwelaka!”

Jizaazai yimaka wideri tewaanya yavada'gaina ya'.

(Matiyui 8:28-34; Luki 8:26-39)

5 ¹Aalibunya pimaginna A'mwe Geraaza mwaalyara mwaaidapijiyabanna yi'mavaawina kye' ²sahwai sipiyavidaa'nyi walamwaaina yadi'nyi yime'nya'bi' a'mwe pwai simaanga gilaaya wakesabadaa'nyai yimaka widei gaminyina wijima'naabina ya'. ³A'mwe sai yuyagaa' gilaaya wakesaba mwaalakelyi. A'mwe aane pwai kwai gaminyi seni'yabaalyi wila mavwiyi yannei. ⁴Sare' darevinyi. Kwalaalyagaa' a'mwera seni'yabara maareva asiraari wila pwekipwekyia sivilyiraari wila pwekipwekyia kye' gami sai asiraari wila pwekinike galayesiwi'na yaka sivilyiraari wila pwiwinike silyalyi livatamayesi'nyina ya'. Sare' aane pwai kwai diraginnakei sahwari

madathivalyi yannelyi. ⁵Yuyagaa' yirikevi sawisavi gilaaya wakadivisabaji mugunyabaji kaanya yamaryada jaka naanga dada gannya kilaakejiki silyaji livadaidaarivainyina ya' yimaka widei.

⁶Sai saamin'yabadaa'nyi daavakei Jizaazari tinna wanganakegaa' yarai kaanyave'na walyaabina yaka "Sahwai naangelyi," daka gaminyawi kwadaai gilaka ⁷jaka naanga widina "Jizaazai, Gotiyai Sigunyavi munya ke'mwi mwaaidereigi midaaka! Niminyina beri' jiziwaana? Gotiyarine'na naange' githivanige. Daanga manyijaavinnera! Mala manyiradinnera!" ⁸Sare' dare'nesi, Jizaazai "Yimakaihi, a'mwere munyikidaa'nyi diwila!" widake'na. ⁹Sai yiwaara'na yawalyaadi' "Giminyine yaya' berivaka?" Yiwaara'na yawalyaadike' yimaka widei widina "Niminyine yaya' Kwala Naangeinyi. Sare' nemi kwala naangeina mwaiho'nanyi." ¹⁰Sara widaka yagaala diraginna diza ya' "Kwaaka davidaasi yimakeraavi mudaasinna!" ¹¹Mugunya sakyavi yaawaryara kwala naanga nidaa'nyina yadaapiji ¹²yimakera diraginna widina "Yaawaryaraayabanna dinedaasa! Yaawaryaraavire munyikaavi wimilaade'na dinedaasa!" ¹³Yimakera sara widina kye' Jizaazai "Yo, diwila!" Widina kya' yimakera a'mweridaa'nyi bwalyuna yeva yaawaryaraavi wilina kye' yaawaryara kwala naanga (2,000) mwaaidapiyara davaanyavi yarai walaawina yeva aalibunyavi wala'na yeva yuyara balina ye'.

¹⁴Saba yaawaryaraavi yi'divaidivisara dara wangesa' "O, akai, nemire yaawaryara mena davaimwaava!" Deva yarai wina yina yeva angebaji wawinyangiji saraavi wide' yagaala sa'. Widesa'na a'mwera dinyina "Sara yima'niwake' nemi walyanganaana!" dineva walyaabina. ¹⁵Jizaazaryawinna walyaabina yeva dara wangesa' "A'mwei kwaabihannya marira'nakei siduta nayaa yawi'manikei kigaa' yimaka kwalaalyara mwaalesai tewaanyai damwaalika!" Deva lika naanga ye'. ¹⁶Lika kye' a'mwera yuya wangesara mudikeraavi yimaka wilakeri sara yima'nakevinaji yaawaryaraavinaji wijiwaakina. ¹⁷Sara wijiwaakina kye' sabanyara sari naanga widina "Nemireba davi namwaidika! Diwona!" ¹⁸Widina yesavi sai sipiyavi yiladaa'di'nyi yimaka wilakei naange' widaanganna "Gimiji mwaaimumeinyi wima' githiwa." ¹⁹Sara widina kya' Jizaazai widina "Aawa. Sare kiri' ginnya angevina wawa'gizi ginnya jilikaimiraayangi Gotiyai sara nayaa gyiwakenna giminyina Gotiyare kale yiwake'na sara duziwaakya!" ²⁰Widina yake'na sai kaanna wina yaka Angaba Atiraalyaba saba Jizaazai gaminyina sara yakenna sara kujiwaaka' a'mwe yuyara atika maru'na'na yina ye'.

**Jaarazare garaavaangesi a'mwe piri' Jizaazare yivisavi
ata yime'nakesi sawaarinesi.**

(Matiyui 9:18-26; Luki 8:40-56)

²¹Jizaazai sipiyavi wilamwaidisi ayihirina sipiya' ayina makuna yakegaa' gaminyawinna kwala bwa'naanya naange' yi'bwa'namwaaina

yadapi sai aalibumaangevi mwaalina. ²²Mwaalina yadi'nyi Lotuangevi maremwaaide pwai Jaarazai wo'nikei bwanganna yaka gamire sivilyaraaryaba kwadaai gilina yaka ²³yagaala diraginna widina “Ninnya taaya nabalinake' balade'na. ‘ “Tewaanya' yima'nana! Gaala mwaalana!” da'umuji “Nimire asiraa dathiwagaawima!” ’ da'gi dulaama!” ²⁴A'mwei sara widina kya' gamiji wawagi. Kaanya wodaakilyi kwala naange' wawesara gaminyawi galyitata ye'. ²⁵Galyitata kye' a'mwe nalaavinake' mwaalake' baizaaka ma'nade' yuyagaa' kwarama atiraai sivilyiridaa'nyi piriwaalya wavila'nike' mwaalakesira nalaavinake'. ²⁶Nalaaya maalika wa'di'nyi nalaavinakevi dotarava yaamiji yiya kye' daanga naanga wivinake'. Gamire yuyajiya mena wijaavina yake'. Tewaanya aane piri' kiri' mi wiake'. Aawa. A'mwe nigwimaaya' sinnawi nalaaya maalike' kininnake', sagaa' nalaaya naange' kininnake'. ²⁷Sare' Jizaazarine'na wi'naka kwala naangevi dusidaa'nyi lika yulyaraabina yaka gamire kwaabiyivisavi yime'nyina. ²⁸Sare' dare'nesi. “Gamire kwaabiyivita gavevi yime'niwija' nimi tewaanya yima'nima!” dake'nanyi. ²⁹Yime'nya'bi' kurabala yaalika mi'na yina. Mi'na yina yaka dara wanganake' “Nimire nabalya' mi'na daaka!” ³⁰Sare' yilaaya kya' yime'nya'bi' Jizaazai sahwai dara wanganake' “Niminyi diraginya' nyalyiwake' daaka!” Dakegaa' kwala naangevi yarai ginyiwannaka widina “Nimire kwaabiyivisavi aai yime'niwaka?” ³¹Sara widina kya' “Kwala bwa'naanya datha' giminyi galyitata yivanigasa'na gara nediwaa? 'Aai yime'niwa?' ” wide' gamirera. ³²Widesa' sahwai sare' yake' tinna wanganya'nei tinna wanganaasina. ³³Wanganasadaa'nyi a'mwe sa' “Nimire kilaakeji' tewaanya' yima'niwaka,” daka lika yina, bi'bita yaka gaminyabanna bula'na yaka yuya sanna widina. ³⁴Yuya sanna widina kya' sai widina “Nyiraavi, niminyina nayaa yawiralimwamwaanya'na gimi maamidarya yima'niwaa. Gimire kilaake' kuna warade' kwaamu'na dimwaihwo'de'ginyi,” widina ya'.

³⁵Kuna widina yadaa'nyi Lotuangevi maremwaaiderera angevidaasi bwalyuna yeva kaanna bina yeva widina “Ginnya taaya' mena baimwaka. Gotiyare yagaala wijiwaakaderi wawinya naanga kuna minna! Taanga wijaavaniginya' kabaimwakira.” ³⁶Sahwara widadaapi Jizaazai yagaala sa' kadika wi'nada Lotuangevi maremwaaideri widina “Lika minna! Niminyina simunyavi diraginna dilimwana!” ³⁷Sara widina yaka a'mwe pwaraavi widina “Sarimi dimwaalyi! Nimiji Pitalyi Jemizalyi Joni Jemizare gya'mwelyi gave saina wawaana! Aane pwaigi kwaigi aawa.” ³⁸Widina yaka kaanna wina yeva Lotuangevi maremwaaidere angevina yi'mavaawina kye' dara wanganake' “A'mwemilika yagaala naanga baziwodaapi pwara kinna dathivanigava! Jakinna dathivanigava!” ³⁹Mi'na wanganaka angevi wilina yaka widina “Yagaala naangesi jakinnyasi baa'na divanigava! Taaya' balya myiwa'. Aawa. Se wari!”

40 Sara widina kya' gaminyina mayagaajika kamaregye' kiri' sahwai yuyaraavi mwasawinna marativotawaasina yaka taayavi ganaangesi ganimaangelyi gaminyawi mwaalesaraji sa makuna kya' taayayabanna wilina ye'. 41 Mi'na wilina kye' gilaayavi ata limwanna yaka kunnya yagaala widina ya' "Talitha kumi!" aangyagaala dina "Taaya'gi dithikaaka!' githiwa." 42 Sara widina kya' yime'nya'bi' taaya' dikaa'na yaka kaanya dikavayamarina ya'. Sare' dare'nesi. Taaya sa' kwarama atiraai sivilyiridaasi pwaraalya wawilavakesira. Kaanya dikavayamarina kya' yime'nya'bi' atika kamaru'nare' 43 sai diraginna widina ya' "Sarimi nayaa dinyu'nyila! Nimi yiwe sa' a'mwe pwai kwai a'mwe piri' kiri' nyu'nadika! Dahaa' taayavine wapaaya nya'ne dumaarila!"

Naazareti mwaalyara "Jizaazai a'mwe naangei mika," de'.

(Matiyui 13:53-58; Luki 4:16-30)

6 1 Sabadaasi sai gannya angebanna wiya'nei wina. Gamirera midinna. 2 Gamire angebanna kyi'mava' Juyaraavire Kwazaakegaa' yima'nakegaa' Lotuangevi buladaa'na yakegaa' wijiwaakina. Sara wijiwaakina yadaa'nyi a'mwe kwalaalyara wi'neva atika maru'nareva dinyina "Yagaala daza' a'mwe dai gawi maa'mwaka! Bewai yiwirivanika! Diraginya yiya wi'niwa'do gamire asiraalyi gara yiwaka! 3 Kaa'madaayai midaaka! Maariyaa' gawaali' midaaka! Jemizalyi Jozizalyi Juthaazalyi Saaimoniji saraavire kwiya'mwei midaaka! Dava nemijiya ganyaabulaanga damwaaihava! Nemiji avaalyalyi. A'mwe naangei mika," dinyina ye'. Sara dinyina yeva Jizaazare simunya myawiri kye' saggaa' gaminyina sinna tika davina. 4 Sinna tika wida'daa'nyi Jizaazai widina "Pwara Gotiyare wi'nawijiwaakyarine yaya' yilaaya makimaniga! Kiri' gamire kwaakeba mwaalyaraji kwiya'mweraji gannya angevi mwaaihasaji sa gamire yaya' mamakilyivaniga!" 5 Sara widina yaka angeba saba diraginya ya'ne aane pini kini mya'. Kiri' nalaavinaka pwaina pwaina, piri'na piri'na ata kudathiwaga' tewaanya mwaalina ye'. 6 Sara yesa'na dina "A'mwe kwalaalyara niminyina manyilimwagiwaava!" Sara yesa'na maru'na'na ya'.

Jizaazarera wijiwakamar ye'.

(Matiyui 10:5-15; Luki 9:1-6)

Sabanne angebanna wijiwakamarina ya'. 7 Sara yakegaa' atiraai sivilyiridaasi pwaraalyara bina kye' "Nimire yagaalya'na a'mwe pwaraaihi pimaginna diwila! A'mwe pwaraaihi pimaginna diwila! A'mwe yuyaihi sana sana jila! Nimire diraginyabwi kyihizaava'muji a'mwe yimaka widivisaraavi wanganapiji yimakeraavi giri'nakeraavi duthaasideihilyi. 8 Tusavine gilyivita maayaihi yadisarikananyaihi diwila! Tika wapaaya, gilya', nigwigilyi' mamaapinera! 9 Aawa. Kwaari'masivila

divaazi'ma'nyila! Baazi'ma'nya piriwaai mabaazi'ma'nipinera! Sare'na yarai diwideihilyira.” ¹⁰Nabaai gamireraavi widina “Angebanna yi'mavaawapiji anga gave pirivi dimwaalyila! Wapaaya'na myiri'maranamaripinera! Anga gave saba se wapijavadaasi kaanna diwideihilyi. ¹¹Anga pibanyara 'A'mweraahi kaajila!' mihiza pwara 'Kirimire yagaalya' wi'naana!' mihiza kwara kamwaalapiji kaanna wiyagaa' 'Anga girikita'nanyababisaba midaaka!' dina yakilyi tiryra saraahire sivila warojiya purakirasi'na yakilyi kaanna diwide'na angebanyara kunnyabwi yawipi'derera. Sare' jalikurakya'nesi.” ¹²Gamirera mi'na wi'neva pina pina yiwinadaa'na yeva a'mweraavi widina “Sarimire simunyabwi mudikebwi jawiramaarila!” ¹³Sara widina yesagaa' yimaka kwalaalyaraavi widaasina yeva a'mwe nabalnakeraavi yisiwelivananya' minyaginyangi dingina yeva tewaanya wimwaaihina ye' gamirera.

Joni Bavitaaziya Yadei bala!

(Matiyui 14:1-12; Luki 3:19-20; 9:7-9)

¹⁴Yuyaba a'mwera gami yakengi dinyidinya yadivisa'na piba maremwaaidei Erotiyai dara wi'nake! “Sahwai nawi'nya jivanika!” Wi'nake' daresi. Pwara Jizaazarina dinyina “Gami sai Joninyira. Joni Bavitaaziya Yadei balaka Gotiyai yidikaavaka savina kwaihwainakei diraginya divaniginya' maaraka tewaanya saza yivanikelyira.” ¹⁵Sara dinyina kye' pwara dine! “Gami sai Yilaajai kigaakuna balyaakelyira.” Dinesavi pwara dinyina “A'mwe sai wi'nawijiwaakadei sinnawi Gotiyari wi'neva a'mweraavi wijiwakyaasarabisalyi.” ¹⁶A'mwe pwara sana sana kadine' Erotiyai widina “Joni sahwalyira. A'mweri wide 'A'mwe Jonimi tilinnya' doripuka!' Kude balakei dahaa' tewaanya mwaali'” wida'. ¹⁷Sare' dare'nesi. Sahwai Erotiyaaza' gya'mwe Pilipimire balaanga' kwala maara'. ¹⁸Sare' dare'nesi. Joni widina “Ja'mwere a'mwe' baa'na ma'mwaana! Sabwina Gotiyare Kiwinyabwi galazekivaimwaa,” widina. ¹⁹Sara widina kya' Erotiyaazavi sinna tika wida'daa'nyi Erotiyai Erotiyaazavi yilaaya maryaka yake'na Erotiyai a'mweraavi kudaasa' Jonimi wila marirakina yeva kalavuzangevi wimwaaihina ye'. Joni kalavuzangevi kamwaala' Erotiyaazavi sinna tika kuna wida'daa'nyi “Jonimi tamakima!” dada Erotiyari kuda' “Aawa,” widina. ²⁰Sare' dare'nanyi. Sai dina “Joni a'mwe naangelyira. Sahwai yida'maraangei. Tewaanyaburi mwaaidei,” daka “Erotiyaaza' naramakadika!” daka Jonimi kalavuzangevi nayaa maremwaaina. Maremwaaina yakei Jonimire yagaalya' wi'nada simunya kwalaalya yawi'na yada yilaaya ya'.

²¹Pigaa' Erotiyaazavinegaa' yima'nakegaa' Erotiyai daka “Ni'waa' niminyi nyimaarakegaa' jima'niwaka!” daka gamire widaayadivisaraavi widina “Yarala, dahaa' Kwaaka maremwaaidivisaraji aawilasaraavi

maremwaaidivita naangeraji Galili mwaalya naangeraji saraavina tika munne jovirayila dahaa' sagaaka!" Widina kya' Erotiyaaza' dara wanganake! "Dahaa' Jonimire balyagaa' daaka!" ²²Sara kada' tika munne nadaapi Erotiyaaazavire garaavaanga' bulaawina yaka kwarama yina. Taaya' kwarama sara kya' Erotiyalyi a'mwerari yilaaya yina. Yilaaya yina kye' Erotiyai taayavi widina " 'Sare nyijaama!' kanyida'gizi gizaavideinyira. ²³Nebulya' githiwa 'Nimire gilyivita naange wari'. Gilyivita sa Kingiyainyireba yune tinnyabanna gizaapalyideinyi, ' " widina. ²⁴Sara widake' walyuna yaka ganaangevi widina "Nimi beri'na widijwana?"

" 'Joni Bavitaaziya Yadere minyaginya' dinyimaryaama!' sara duthana!" ²⁵Sara widina kya' yime'nya'bi' taaya sa' yarai bulaawina yaka Erotiyari widina "Dara yawi'manige. Joni Bavitaaziya Yadere minyaginya' maara'gizi paletiyavi waka'gizi yarai nyijaama!" ²⁶Widakevi Erotiyai kale naanga wiadaa'nyi "Nebulya' githiwa," widake'na nabaai tika munne nesara sara wi'nesa'na " 'Aala,' nudiwidika!" daka ²⁷yime'nya'bi' dameri widaasa' "Joni Bavitaaziya Yadere minyaginya' dalamaralingipuramaraawa!" Widaasakei walyuna yaka kalavuzangevi Jonimire tilinnya' woripu'na yaka ²⁸minyaginya' paletiyavi wakina yaka makulaabaka taayavina bulawijaava'. Kabulawijaava' taaya' ganaangevina wijaavina. ²⁹Sagaa' Jonimirera dara wi'nesa' "We', Joni mena davaimwaka!" Deva kaanna wina yeva kilaakeji' maarina yeva kaanna makwaweve simaangevi wakina ye'.

Jizaazai a'mwe kwala naanga naangeraavi wapaaya wijaava'.

(Matiyui 14:13-21; Luki 9:10-17; Joni 6:1-13)

³⁰Jizaazai widasaawakera yagalaaweve ayina beva gaminyi kumi yuya sara yesa'na nabaai wijiwaakesa'na widina. ³¹Widina yesara mwaaidapi kwalaalyara bulawi'nyaagaidivi' wodaapi pwara bulawi'nyina yadaapi Jizaazalyi gamireraji wapaaya nya'negaa' mwarina. ³²Wapaaya nya'negaa' mwari yake'na gannyaraavi widina "Gaveina a'mwera maayawinna kwawaaji pigaa' kwazaaka dimwaalyila!" Sara widina kya' sahvara gavera sipiyavi wilamwaidapi piwi a'mwera maayawinna makuna ya'. ³³Makuna yadaa'nyi a'mwe kwalaalyara tinna wanganewa "Jizaazai gamirerari damakuvanika!" deva anga yuyabanyara aalibumaangevi kaanyave'na kaanyave'na sahvaraavi wawilaveva a'mwera maayabanna yi'ma'na ye'. ³⁴Yi'ma'na yevera aalibumaangevi mwaaidapi gami kwaakevaki bwalamwaaina yaka dara wanganake' "Kwala bwa'naanya naange' daaka!" Daka "O, a'mwe dara a'mwe da jilikyaawarya sipizipiya yi'divaidei maaya yaasiwa'na mwaaihava." Sara dina yake'na gamire kale wiadaa'nyi yagaala kwalaalya gaai wijiwaakina yina ya'. ³⁵Wijiwaakina yina kya' sawitirinyaburi gamirera

bina yeva widina “Sawisaburi menanyira. ³⁶Dava anga mamannyika dava a'mweraavi duthana! ‘Davadaasaihi, angeburaji wawinyaba anga mannikebaji wawopiji sariminne wapaaya nya'neihi dinyide dimubyila!’” ³⁷Sara widina kye' sai widina “Sarimi saihi wapaaya dumaarila!” Widina kya' “Nemi gara yaajiwo? Nigwia kwalaalya (200 kinaaya) maraaji kwaji girikula mubaawina yawaaji a'mwe yuyara wapaaya maalika kanipidika!” widina gamirera. ³⁸“Wapaaya gara gara wari? Danganamarila!” widina. Sai widina yakera tinna wanganamaryaaweve ayawinna beva widina “Girikula dawaai dawaai da' jawinya pwaraalyi wa'di'nyi wangamwona,” buthe' gaminyi. ³⁹Buthina kye' a'mwe sahwarraavi widina “Kurivaariyangi yuyaraavi nayaa geva geva jawibwaramwaaihila!” ⁴⁰Sara widina kya' piba kumi kwala naanga (100) mwaalina, piba kwala naanga (50) mwaalina, sana sana ye'. ⁴¹Sana sana mwaalina kye' Jizaazai girikula atilya dazaji jawinya pwaraalyi maaraka sigunyavina maranganaka Gotiyarina “Su! Wapaaya danna gimire yaya' makimwa,” widaka girikula gunyina gunyina yaka gamireraavina wimaarina a'mwe kwala naanga mwaaidapijyaraavina yanga wimuja'ne. Nabaai jawinya pwaraai milikina milikina yaka yuyaraavina yanga jaapalawimuda'. ⁴²Kajaapalawimuda' tika nyina kye' munya yunebanna kwina' ⁴³pini warina niganakesa warina kya' gamirera maarina yeva jawinya sara niganaketa maarina yeva gilya atiraai sivilyiridaa'nyi pukaalyangi maramihyeku'na ye'. ⁴⁴Wapaaya nesamilikaavidaasara a'mwe gavera (5000) paavi taawizaniyara mwaaleva nyina ye' wapaaya.

Jizaazai aalyavi a'ba wawoke'nesi.

(Matiyui 14:22-23; Joni 6:15-21)

⁴⁵Yime'nya'bi' gannyaraavi widina “Yarala, sipiyavi wilamwaalapiji angeba Betizaaita aalibunyavi pimagi mannikebanna diwideihilyira. Wodaapiji kwala bwa'naanya davi wididehaa'nanyi ‘Sarinnya angengi diwila! Divi nimi wilaabidera.” ⁴⁶Sara widakera wina kye' kwala bwa'naanyavi “Tewaanya diwila!” widaka “Gotiyari widima!” daka mugunyangi yilaawina ya'. ⁴⁷Yilaawina kya' sawisa' kajinna' gamirera sipiyavi mwaaidapi aalibunyavi tinnyaba sipiya' wil'di'nyi gawei kwaakevaki mwaalina. ⁴⁸Mwaalina yakei wanganake' “O, yihuta naange! tivaata'mwake'na nimirera aalyavi yisikari yarai yarai makwiya yadaapi sipiya' kavena damakuvanika!” Daka yirikunyagaa' aalibunyavi a'ba ga'niguna yaka sipiya' wa'disiyaba “Nimireraavi wawilavima!” yawi'na. ⁴⁹Yawi'na yakei aalyavi a'ba ga'niguna yakeri gamirera wanganeva “Ai, gilaayai daaka!” deva “Ewi,” jaka widina. ⁵⁰Sare' dare'nanyi. Yuyara gaminyina tinna wanganna yadivi' lika naanga yina. “Ewi,” jaka widina kye' yime'nya'bi' widina “Diraginna dimwaalyila! Niminyira. Lika mipinera!” ⁵¹Sara widina yakei sipiyavi yilamwaaina kya' yihusa' mi.

Yihusa' mi kya' gamirera kumi sara tinna banganakulina ye'. Atika naanga maru'na'na ye'. ⁵²Sare' dare'nesi. Gamire diraginya'na myawiri ye'. Sahwai wapaaya gunyadaa'nyi wapaaya kwalaalya yima'nyina yakevi wanganyawalyaadaasara myawiri ye'. Aawa.

**Kwaakeba Ganezaareti Jizaazai nalaavinakeraavi
tewaanya yavada'gala'.
(Matiyui 14:34-36)**

⁵³Aalibunyavi ga'makuna yeva Kwaaka Ganezaaretina yi'mavaaweveva sipiya' wila marirakina ye'. ⁵⁴Marirakina yeva sipiyavidaasara waidavadaapi yime'nya'bi' a'mwe a'mwera gaminyi tinna wanganeva ⁵⁵kaanyave'na waweve anga yuya dangi a'mwe nabalnakeraavi maramarina. Sai mwaaidisiyabanna yi'binnakeraavi makabina “O sahibanna damwaalika!” deva sahibanna makabina. ⁵⁶Sahwai anga naanga kiba anga maalika piba gazabazaba wilyiri'maa'na kya' kumi wapemubya yadivisabanna nabalnakeraavi makabina ye'. Makabina yeva yagaala naanga widina “Nabalnakera gimire kwaabihannyavi maangebaari yime'nyina yipika!” deva widina kye' nabalnakera gamire kwaabihannyavi yime'nyina yeva yuya sahwara tewaanya mwaalina ye' nabalnakera.

**Juya sinnawinyaraavirebulyi.
(Matiyui 15:1-9)**

7 ¹A'mwe Periziyaraji yagaaikiwijara Jeruzaalemidaasara pwaraji sara gaminyawinna yibwaramakabina yeva ²dara bwanganesa! “Gamire pwara ata girikita'nanyara asangi aalya minyara wapaaya danivanigava!” ³Sare' dare'nesi. Periziyaraji Juya yuyaraji sara dinyina “Ne sinnyawinyara sara dinike'na nemi sara yaana!” Dinyina yadivi' asangi aalya minyara wapaaya nadivitara mi'. ⁴Sara wapemubyasiyara kunnya angevi wileva aalya minyevera wapaaya manyi ye'. Ne sinnawinyaraavirebwi kumire simunyangidaasi maalikebwina mi'. Naangebulyi piburaji limwadivi' “Nemire kuryara girikita'nanya nyipidika!” deva kaapivananya maa'gula paletiya aalya yina ye'.

⁵Sara yadivisara Periziyaraji yagaaikiwijaraji sara yikabina yeva yiwaara'na “Gimirera ‘Ne sinnawinyaraavirebwi yaana!’ majara ata girikita'nanyaji nivaniga'. Ne sinnawinyaraavireburi kaanya myamarivaniga'. Aawa. Ata giriki'nakera wapaaya nivaniga'. Sabwi be'na yivanigava?” ⁶Tivi'na yiwaara'na kye' wida! “Aazaayai Gotiyari wi'nawijiwaakadei piropetiyai sariminyina kwaasiyabwi yadivisaihirina nayaa dinikabaabisasira.

A'mwera nayaa maangi'na nyidivanigasa!
Kumire simunjabwi menyaba wari'.

⁷ Gazare yilaaya nyidivanigasangi mu'nyivanige.

A'mweraavirebwi yaasiwa'na wijiwakadaapiri

'Gotiyarebulyira,' yawi'na yivaniga!

Sara dinikesira. ⁸ Sarimi Gotiyare yagaakiwinya yagalya'ma'manigasa' a'mweraavirebwi nayaa limwamaniga!" ⁹ Nabaai widina "Nawi'nyina Gotiyare yagaakiwinya wasi'na yadivi' sarinnyabwi midinya'neihi yivanigasaihilyira. Be'na yivanigava! ¹⁰ Sare' dare'nesi. Mozizai wijaa' 'Gimaamaangelyi gwaangesi sayori nayaa kadika divada'galawi'nana!' Nabaai 'Pwai yuyagaa' ganimaangerina ganaangevina birala yadei yuna balana!' ¹¹ Mozizai sara widina yaaka kiri' sarimi dadivi' 'Pwai widaza' "Nimwai pwai niwaa' kiri' kamaaradike nimore Kovaniya' warikengira." ' (Kovaniya' yagaala sa' "Gotiyarina wijaaya'neva dinike!") ¹² Sara kudozi 'Kovaniya' mi'na waka'gizi gimaamaanga pwarina gwaanga kirivina mujaavinna!' sarimi sara dakadivi' a'mwe sai navika mwaaladelyi. Sara yadivi' 'Nemirebura nemire kaimiraayaraavi wijiwakaana!' ¹³ Sara dadivisa'na 'Gotiyai wijaake' gesira,' yawi'divitabaabisasi. Nabaai avaalyabita kwalaalya sana sana yadivisaihilyira."

Yuya girikita'nanya.

(Matiyui 15:10-20)

¹⁴ Sagaa' kwala bwa'naanyavi jaka ayina jivwaramaa'na yaka widina "Yuyangihi, nyu'napi simunya nayaa jawirila! ¹⁵ Mwasimaginya aane piri' kiri' a'mwe pwari kulaabozi girika yima'nannei mika. Aawa. Yuya a'mwe sare kusimaginyavidaasa kwalyaabozi girika yima'nadengira. ¹⁶ A'mwei kadi'nakei nayaa wi'nana!"

¹⁷ Kwala bwa'naanyavi yagalya'mavaka angevi wilina yakegaa' gamirera yagaala ke'ba'nanya'na widina. ¹⁸ Sara widina kye' widina "Nabaai pwaraji sarimiji sara myawirijiwaava! 'Yuya kamaranoji mwasimaginya a'mweri kulaabozi girika yima'nannei mika,' myawirijiwaava! ¹⁹ Wapaaya sa simunyavi mulyi yade'nanyi. Aawa. Gamire singwalikeri bwalaawina kyoji lika wirasi'na yadengira." Sara widake' "Tika wapaaya yuya kimaaka mika." ²⁰ Sai widina "A'mwere kusawinyavidaasa' walyaabina kyoji sa' girika yakadesira. ²¹ Sare' dare'nanyi. A'mweraavire simunyavidaasi yawita kayaa'na naanga yina, gami maridaakunyina, kuka yina, a'mweri tamakina, ²² a'mwevi ata limwanna, gilyivisangi wabarinna yina, yi sinna tika widaya'nebwi yina, kwaasi yina, jilikera yadivisabaabi' yina, tiganaarya yina, pwarina kwaasi yagaala dina, birala yina, pihadika yina, yi yaasiwa'yamarya yina yadivisangira. ²³ Kayaa'nanya yuya davura kusawinyavidaa'nyi walyaabina, a'mwere simunyavidaa'nyi walyaabina kyoji girika yakina yadengira," Jizaazai widina ya!

**“Jizaazai diraginaangelyi,” a'mwe' wida'.
(Matiyui 15:21-28)**

²⁴Sabadaasai angeba Taayaa sabannei wina. Anga saba Kwaaka Siriya mannikeba. Sai wina yakei “Aane pwai kwai aane piri' kiri' nanyanganadika!” daka angevi kave mwaalina yada lika yulya'di'nyi kiri' a'mwera dara wangane! “O, dava sahwai damwaalika!” Mi'na kade' lika myulyari yakelyi. ²⁵Yime'nya'bi' taaya' yimaka widevi ganaange! “Sahwai mwaalika,” wi'naka bina yaka gamire sivilyiraaryaba a'mwe sa' bularutawa'na ya'. ²⁶A'mwe sa' Girikiyagaala dade' Kwaaka Siriya mwaalya Piniziyaraavire' a'mwe sa' naanga yiwaara'na “Nyiraavaangavire munyiki yimakeri duthasaawadeigi daaka?” ²⁷Yiwaara'na kya' Jizaazai Juyaraavi wigaimwadei wijiwaakiyagaala widina “Sinnawi kaimiraayangina wapaaya wijaavipika! Sare' dare'nesi. Sinnawi jilikeraavina kaimiraayangire wapaaya namarasi'nipidika!” Sa'na widake' sinnawi Juyaraavi wigaimwadelyira. ²⁸Sara widina kya' a'mwe sa' daka “Juya'nyi mika. Maave'nyira. Jilika sarabisa'nyi,” daka widina “Yo, Naangeigi sa'na kaimiraayangire wapepwaka kabwalaraawoji jilikera yi'binyavi dalaangevi mwaalapiji maribwaranipi'derera.” ²⁹“Gimi nyidiwaanyavina ginnya angebanna wawo'gizi taayavi dangadera. Dahaa' yimakai taayavire munyikidaa'nyi mena wiwaka.” ³⁰A'mwe' wi'naka gannya angebanna wina kya' taaya' yi'binyavi wa'di'nyi dara wanganake! “Yimaka marawinaangi'dei mena dawwalyuwaka!”

Kadikiryai yagaala majai tewaanya yima'na'.

³¹Anga Taayaa sabadaasai Saaithoni angeburina yi'mavaawina yaka pina lavita'na yaka Atiraalyaba angeburaavi gi'mavamaryaka aalibunya Galilina yi'ma'na ya'. ³²Yi'ma'na kya' gaminyawinna a'mwe pwara a'mwe kadikiryai taali'mabyari jivwaramakabina yeva naanga widina “Kadikiryare minyaginyavi ata dithathiwana!” ³³Sara widina kye' sahwai kadikiryari sangineba makuna kya' gaveraai mwaaidakilyi Jizaazai gamire kadikikaari asirai tilavalimwaga'nyina yaka asiri maagwala yinyina yaka kadikiryare taalisi dathakina yaka ³⁴sigunyayina maranganaka simudingwaimale yaka widina Juyaraavire yagaalyavi “Epaata!” Yagaala sa' “Kadika divaaso!” kadika tewaanya wi'nya'na dinikesi. ³⁵Widina kya' kadikiryare kadika tewaanya wi'nyina yaka gannya taalisyali yagaala tewaanya dina sagaa'. ³⁶Kadikiryai tewaanya mwaaidi'nyi Jizaazai a'mwe pwaraavi widina “Nimi yiwe'na aane pwari kwari yagaala mudipinera!” wida' yagaala naanga. Diragina sara widake sa'na widiwija yesara diraginaanga sara ye'. ³⁷Pwara wi'neva atika maru'nareva “Sahwai yuyangi tewaanya yiwakelyira. Kadikiryara nayaa wi'nya'neraavi wimwaaiahada taali'mabyara nayaa wija'neraavi wimwaaiahadei,” dine'.

**Jizaazai a'mwe kwala naangeraavi (4000) wapaaya wijaava'.
(Matiyui 15:32-39)**

8 ¹Yirika sangi gaminyawinna kwala naange! yi'bwa'nyina yeva tika wapemaayara mwaaidapi Jizaazai gamireraavina jaka jivwaramaaraka widina ²“Kwala bwa'naanya dasi nimiji yirika daryaai dari' mwaaidori ya'na dahaa' wapaaya maayaraavina kale nyiwa!.” ³Kumi mijika wiadaasi ‘Sarinnya angebanna diwila!’ widiwija' a'mwe pwara maave keiba mwaalyaraji a'mwe pwaraji tusavi mijika nabalapika!” ⁴Widina yakevi gamirera yagaala ma'maa'na “Dava a'mwera mamwaalyadivisaba aane pwai kwai a'mweraavine wapaaya gawi maarajiwa!” ⁵Sai yidaangana ‘Girikula gara gara warika?’ Sara kyidaangana! “Ati ata puridaa'nyi pwaraaina.” ⁶Sara widina kye' kwala bwa'naanyavi widina “Yuyangihi, kwaakevi dalamwaalyila!” Widina yaka girikula ata puridaa'nyi pwaraalyangi maaraka Gotiyari “Su! Su!” widaka gunyina gunyina yaka a'mwengine wapaaya wijaaya'nera gamireraavi wijaavina kya' sara kwala bwa'naanyavina wijaavina. ⁷Mi'na wijaavina yesara jawinya piri'na piri'na wa'disiya wimaarina kye' Gotiyari “Su! Gimire yaya' makimwa,” widaka gamireraavi widina “Jawinya daji a'mweyuraavina yanga dumaarila!” ⁸A'mwe yuya maranyina kye' munya yinyina kya' wapaa pini niganakina yeta bwakuna wapaaya pini gilya ati ata puridaa'nyi pukaalyangi maramihe' gamirera. ⁹Tika wapaaya neta kwala naanga naanga (4000) mwaalesare. Mwaalesaraavi sai widina “A'mweih, wapaa mi'na nivanigasaihi, sarinnya angebanna diwila!” ¹⁰Sara widina yaka yime'nya'bi' widaasina, gamirerari sipiyavi wilamwaaina kya' Kwaaka Dalimaanutaneraavi makuna ya'.

**Periziyara Jizaazari wide' ‘A'mwera mwanganyadivisa' ja!’
(Matiyui 16:1-4; Luki 12:54-56)**

¹¹Saba Periziya pwara gaminyawinna wilaabina yeva “Gami sari kayaa'nanya'na yaamiji widaana!” yawireva “Yidakwasanganaana!” deva widina “Gotiyare diraginya' maara'gizi wijiwaainya diraginya' ja! Wanganaade'na Gotiyareigi dingaka?” ¹²Sara widina kye' gamire simunyavi kale wiadaa'nyi simudingwaimale yaka widina “Dahaa' mwaaihasara ‘Wijiwaainya diraginya' ja!’ baa'na nyidiwaava! Nebwi yihithivanige. Wijiwaainya diraginya' mwanganyi jideihilyira dahaasaihi. Arikawinyira.” ¹³Sara widina yakei kumi saraavi yarai yagalya'mavaka sipiyavi wilamwaaina kya' aalibunyavi pimagingna makuna ya'.

**Periziyaraji Erotiyalyi saraavire yagaala kayaa'nanya'nesira.
(Matiyui 16:5-12)**

¹⁴Gamirera wapaayanna navika yina kye' kumiji sipiyavi girikula gave piri'na wara! ¹⁵Girikula gave piri'na wa'di'nyiyagaa' gami “Dinyu'nyila!

Mala nayaa jiwannyila! Periziyaraavire liwinya pamidakya'nesi Erotiyare liwinya pamidakya'nesi nayaa jawirila!" 16Widina kya' gamirera dinyina "Wapaaya mamaariwo'na nediwaka." 17Dinyina yesa'na Jizaazai yawiraka widina " 'Nemi wapemaayainere!', baa'na dimaniga! Kunya' myawirijivaniga! Sidu'maayahi daa! 18Tinnakeihi, tinna mwanganyijivaniga! Kadi'nakeihi, kadika mu'nyijivaniga! Nimi sinnawi ye'na nayaa myawirijivaniga! 19Sagaa' girikula atina gunyina kye paaivi taawizaniyara mi'na kane! wapaa bwakuna yake sarimi gilya gara garengi maramihe'?" Sara widina kya' widina ye! "Atiraai sivilyiridaa'nyi pukaalyangi maramiho." 20Widina kye' widina "Girikula ati ata puridaa'nyi pwaraalyangi po taawizaniyara kaniwa'daa' wapaaya pininna yunebanne gilya gara gara maramihiwa'daa'?" Sara widina kya' widina "Ati ata puridaa'nyi pukaalyanginyi." 21Widina yesaraavi widina ya! "Sa'na dahaa' kunya kuna myawirijivaniga'?"

Anga Betizaaita tinnyaraai yuyaraai tibinyai wangana'.

22Kumi Anga Betizaaitana kyi'mave' gaminyawinna a'mwe pwara a'mwe tibinyari jiwaramakuna yeva naanga widina "A'mwe dari ata dithathiwade'nanyi!" 23Sara widina kye' Jizaazai tibinyare asavi maaraka angebadaasi jiwaramakuna yaka gamire tinnyaraari maagwala wopina yaka gamire tinnyaraari ata dathiwagaka yidaanganna "Piri' kiri' dangamwaana?" 24Yidaanganna kya' maranganamaryaka widina "A'mweraavi dahawangamanige? Yisara kaanya yamaryivanikabaaibi' sahwarraavi wanganaasiwana." 25Sagaa' widakere tinnyaraari ata ayina dathiwanna kya' a'mwei diraginna kwangana' gamire tinna tewaanya kyima'na' yuyangi tinna nayaa wangana'. 26Nayaa wangadaa'nyi sai widaasina ya! "Ginnya angevina diwona! Anga dava ayina mulaawinnera!"

Pitai Jizaazarina nayaa wida'.

(Matiyui 16:13-20; Luki 9:18-21)

27Jizaazalyi gamirerari sara Sizaariya Pilipaai angeburaavina gi'mavamarina yadaapi gamireraavi widina "Niminyina a'mwera aihwala nyidivanigava?" 28Gamirera widina "Giminyina 'Joni aalyavi bavitaaziya yakei dikaavakela,' pwara dimaniga!. 'Ne Yilaajai dikaavakela,' pwara dimaniga!. 'Gotiyari wi'nawijiwakyaaka pwai dikaavakela,' pwara dimaniga!." 29Sara widina kye' yiwaara'na "Sahwaihi, niminyina baariva dimanigataihilaka?"

"Kiraaзитiayiginyira. Gotiyai githasaabakeiginyira." 30Pitai sara widina kya' sai "Naange! yihithiwa. Sa'na niminyina aane pwari kirivi mudipinera!" widina ya!

Jizaazai gannya daanga wivinya'na gannya balya'na wida'.

(Matiyui 16:21-28; Luki 9:22-27)

31Sai gamireraavi gaai wijiwakina "A'mweraavine Kaimiraayainyi daanga naanga nyivinadeinyira. Juyaraavire a'mwe naangeraji

sipizipiya Gotiyarina mubithika yira'divita naangeraji Kiwijaraji sara niminyina 'A'mwe kayaa'nanaangelyira,' dinapiri nyiramakipi'deinyira. Kanyiramakapi yirika daryaai dari' kanyavilavoji baryainyi ayina dikaavideinyira.”³² Yagaala sa' ku'maayaba aangyagaala widina kya' Pitai sahwari sangyinebanna jiwaramakwoka maanga widina “Naangeigi, sabwi myawi'dinna!”³³ Sara maanga widina kya' ginyima'naka gamireraavi tinna wanganaka Pitari maanga widina “Saataanigi, niminyi dusimaginna diwona! Gotiyai sara yawi'manikebura myawirivanigi. Aawa. A'mwera sara yawi'manigasabura yawi'maniginya'nanyi.”³⁴ A'mwe kwala bwa'naanyaviji gamireraaviji jaka wijiwaramaa'na kya' gaminyawinna bina kye' widina “A'mwe kiri' a'mwe kwai 'Jizaazareinyi. Midinima!' yawiraja' 'Niminyine'na myawi'munera!' dathe'na pwara 'A'mwera yita yovihirarannikeviri tamakaana! kadapiri sai 'Jizaazarina balideinyira,' dozi nimorebwi yawi'dei nyimidinadelyira. ³⁵Sare' dare'nesi. Yi a'mwe pwai lika yoji 'Nanyiramakipika! Nimire gaalya' padaihasamaa'nima! Jizaazari wasi'nideinyira,' dozi navika mwaalajai gamire kuryai kayaaka yadelyira. Kiri' pwai 'Jizaazarina nyiramakipi'deinyira. Nimire gaalya' kayaaka yana!' yawi'da nimire yagaala tewaanya'na yawiraja' yuyagaa' gamire kuryai nayaa padaihasamaa'delyira. ³⁶Sare' dare'nesi. A'mwe pwai Kwaaka davaki gilyivisaji yuyaji sangi maaroji manyilimwagari kyoji gamire kuryai yiwina yadelyi. Sa' tewaanya' daaka! Arikewinyira! ³⁷Sare' dare'nesi. A'mwera kuryai kayaaka yima'nyina kyoji gannya kuryarina a'mwe sai Gotiyari berisi mubathelaka! Aawa. ³⁸Sare' dare'nesi. Kwaaka davaki mwaaidivisara Gotiyarina navika yadivi' a'mwe' a'mwe pwari ata limwanna yade'bisarera. Kayaa'nanaangera niminyinaji nimire yagaalya'naji sangina 'Wagila nanevwa'nadika! Sahwari wasi'nima!' deva yivanigasara. Nabaai divi A'mweraavine Kaimiraayai Ganimaangere byaanna diraginya' kamaaroji Gotiyare mamaayara ejeliya tewaanyaraji kwalaabori wagila wivwa'nivanikeraavina gami sari wagila wivwa'nadelyira. Saraavi wasi'nadelyira.”

Jizaazare kilaakeji' yaaka naanga byaannakeji' yima'na.

(Matiyui 17:1-13; Luki 9:28-36)

9 ¹Sai a'mweraavi widina “Nebwi yihithiwa. Dava mwaaihasarajiya pwara divi kwaihwainakera kuna mwaalapiji mabalyi yapiji dara wangabi'de' 'Ai, Gotiyai diraginna damaremwaalika!' Sara wangabi'dehaa'nanyi.”

²Yirika daryaai daryaai daryaai kwavilava! Jizaazai Pitalyi Jemizalyi Joniji saraavi maarina kya' mugunya naangevi yilaawina yilaawina yeva gavera daavina kye' pwara mamwaalyi kye' gamire kilaakeji' nawi'nyaji' gavinyaji' kyalingina' kumi tinna wanganna. ³Tinna

wanganna yadaapiji gannya kwaabihannya yaaka naange' yima'nakevi Kwaakevaki mwaaidivisara yaaka sa' sara myalinginyadesira. ⁴Yaaka naange' kyima'na' Ne sinnawinyaraai Yilaajaly Mozizalyi saraai Gotiyarebadaasaraai yima'naabina, daavina yagila Jizaazari widina kyagi dinyina. ⁵Sara dinyina kye' gamirera tinna wanganna yeva Pitai Jizaazari yaasiwa' widina “Nejiwaakadinyaigi, nemi dava mwaaiho' tewaanyasira. Siminya dawaai dasangi yarilaana! Piri' giminyine!, piri' Mozizarine!, piri' Yilaajarine! yarilaana!” ⁶Sare' dare'nesi. Pitai “Nimi gara dijiwa?” dina yakelyi. Nabaai sare' dare'nesi. Sahwalyi gamireraalyi sara lika naanga yesa'nanyi. ⁷Sagaa' yiraaya' kuminyi gi'dala yirina kya' yiraayavidaasi maanguraaya' “Dathai nyibwaalivaangelyi. Yilaaya yadi kurya wikadinyalyira. Dahwari nayaa du'nyila!” ⁸Yagaala sa' wi'neva yime'nya'bi' dara wangesa' “Ai, aane pwai kwari tinna mwanganyi, Jizaazai gavei nemiji damwaalika!”

⁹Silyaridaa'nyi gamirerari waidavadaapi sai naanga widina “Wangamwaasa'na a'mweraavi mudipinera! Divi A'mweraavine Kaimiraayainyi bala'muri bainikeraayawidaa'nyi dikaa'mujahaa'na yi sagaa' duzideihilyira.” ¹⁰Sara widina kya' kumi sara a'mweraavi yagaala sa' mujiwaaki. Mujiwaakya'nera dinyina “'Bala'muri bainikeraayawidaa'nyi ayina dikaavideinyira,' nediwake'na be yagaalavaka?” ¹¹Sara dinyina yeva gaminyi yiwaara'na “Yagaaikiwijara nedivaniga' 'Sinnawi Ne Yilaajai kabozi divi Kiraazitiyai bathelyira.' Savine'na baa'na nedivaniga'?” ¹²Sara wi'naka widina “Yo, dinike' sinnawi Yilaajai bozi yuyangi yavada'galadelyira. Nabaai A'mweraavine Kaimiraayainyina dinike' 'Yi Kwaaka davaki daanga naanga wivinadelyira. Yi yilaaya mamari yipi'delyira.' Sare' gara yida'nikavaka? ¹³Kiri' nimi sainyi yihithivanige. Yilaajai mi'na bakelyira. Mi'na bakeri kayaa'nanaangenna wiesa' Gotiyare bukuya' sara dinikabaabisanesira.”

Kaimalei yimaka wideri Jizaazai nayaa yavada'gala'.

(Matiyui 17:14-21; Luki 9:37-43)

¹⁴Gamire pwaraavi wijima'naawevea dara wangesa' “Kwala bwa'naanya naange' kuminyaba mwaaidapi Yagaaikiwijaraji nemireraji maanga dathimanigava!” ¹⁵Dina kye' yime'nya'bi' bwa'naanya yuya' gaminyi tinna wangesagaa' atika maru'nareva gaminyawinna kaanyave'na beva “Naangeigi,” widina. ¹⁶Sara widina kye' sai yiwaara'na “Maanga be'na dimanigataihilaka?” ¹⁷Yiwaara'na kya' bwa'naanyavidaa'nya pwai widina “Nejiwaakadinyaigi nyibwaalivaangei yimaka widei yagaala majari giminyawinna makabiwa. ¹⁸Yimakei galalimwanna yada kaimaleri kwaakevina bwalamarakina yadehaa' gamire maangevi maagwaitala yima'nada maangerika maagilaku'gilakuta yadaasi gamire kilaaka yuneba diraginya yima'nade sagaa'. 'Yimakei duthaasila!' dena gimireraavi kudiwa

sahwara yina yina kyiwa'a' yimakei kuna widelyira. Myi yipinere.”¹⁹ Sara widina kya' sai ma'maa'na “Dahaasaihi, malimwagyadivisaihi sariminyaba mwaala'muji yihiziwaaka'muji sariminyine'na taanga kuna gathingaa' maarideinyaka! Kaimale dai niminyawinna dimakabyila!”²⁰ Mi'na widina kya' makabina kye' yimakei Jizaazari wanganaka yime'nya'bi' kaimaleri yikilaaka galyima'na kya' kwaakewi bwala'na yaka ginyiwannya ginyiwannya yina kya' gamire maangevi maagwaitala yima'nyina.²¹ Sara yima'nyina kya' sai ganimaangeri yiwaara'na “Sa' gareгаа' yima'nakavaka?” Yiwaara'na kya' ganimaangei widina “Kaimale maalikeгаа' sara yima'na.”²² Kyima'na' yimakei kwalaalyagaa' kaimalerina ‘Tamakima!’ daka dikevi marasi'na yada avaala kwai aalyavi marapaihina yadei. Sare' kiri' ‘Nimire diraginya' darika!’ diza' naariminyina kale kagyozi nehigaimwana!”²³ Sara widina kya' Jizaazai widina “‘Nimire diraginya' darika!’ diza' pwai nayaa nyimidimanikei sahwai yuya yannelyira.”²⁴ Diraginna sara kuda' yime'nya'bi' ganimaangai yarai widina “Gimidimanigewwi maalika warike'na naanga yima'nya'ne' dinyigaimwana!”²⁵ Jizaazai dara wanganake' “O, kwala bwa'naanya' kaanyave'na jikabivanigava!” Daka yimakeri maanga widina “Yimakeigi kadikiryaigi yagaala majaiigi kaimaleri be'na wimwaaihina! Gamire munyikidaasi yunakaanna diwona! Ayina nabwidika!”²⁶ Sara widina kya' yimakei jaka dina yaka kaimaleri naanga galyima'na yaka bwalyuna. Sara bwalyuna kya' kaimalei baryaibi' warina kya' pwara dinyina “Mena baimwaka.”²⁷ Sara dinyina kye' Jizaazai gamire asavi yiri'bwa'na kya' kaimalei sagaa' tewaanya dikaa'na yaka daavina ya'.²⁸ Angevi mi'na wilamwaaina kya' gamiji gamirerari gavera mwaaidapi gamirera yidaanganna “Sahwaina yimakeri widasaanne' gara yawaaji widasaannekajinyira?”²⁹ Yidaanganna kye' sai widina “Yimaka darina Gotiyari tibariyagaala kadapiri bwalyawodelyira. Aane piri' kiri'na mika!”

Jizaazare balyagaa'na pigasaai wida'.

(Matiyui 17:22-23; Luki 9:43-45)

³⁰ Sabadaa'nyara Kwaaka Galili wavila'na. Wavila'na yadaapi “A'mwera nanyangabithika!” daka sai kave wina.³¹ Sare' dare'nanyi. “Nimireraavi wijiwaakima!” daka widina “A'mweraavine Kaimiraayainyi pwai niminyi yikamaangeraavina kwibwaridaakwoji yikamaangera kanyiramakapiri balideinyira. Mi'na bala'muji yirika daryaa' dariki ayina dikaavideinyira.”³² Sara widina kya' yagaala sa'na myawiryadivi' nabaai, yidaanganya'na lika yina ye'.

“A'mwe naangei bewalaka?”

(Matiyui 18:1-5; Luki 9:46-48)

³³ Angaba Kaapaniyamina yi'maveva angevi ayina kabulamwaale' sai gamireraavi yiwaara'na “Tusavi wivanigasaihi be yagaala

dimanigatavaka?” ³⁴Widina kya' sahwara yagaala majara mwaalina. Sare' dare'nesi. Tusavi dinyina “Nemijiyai a'mwe naangei aaihwalaka? Nimi dingaka?” ³⁵Majara mwaalina kye' walamwaalaka gamire atiraai sivilyiridaa'nyi pwaraalyaraavi jivwaramaa'na yaka widina “Pwai gannya simunyavi ‘Sinnawinyainyi yima'nima!’ yawirajai sai yuyaraavine aayaangei yima'nana! Yuya saraavina widaayadei yima'nana! Sai yawi'na ‘Nimi maalikeinyira. Yuyaraavire widaayideinyi yima'nima!’ doziya sahwai naangei yima'nadelyira Gotiyarina.” ³⁶Widina yaka kaimiraayamili' maaraka tinnyaba mwaaidapiyaba gannya ti'munyavi maramuji'na yaka widina ³⁷“Pwai kwai niminyina yawiroji kaimiraaya daibisamili' maaraja' niminyi nyimaaradeinyira. Nabaai sai sara nyimaarajai niminyi gaveinyi nyimaaradeinyi mi'. Aawa. Nimaamaangei nyidasaabakeriji maaradelyira.”

Neyamwelyireva.

(Luki 9:49-50)

³⁸Joni widina, “Nejiwaakadinyaigi, nemi dara wangamwo' ‘A'mwei gimire yaya' widaka yimakeraavi a'mweraavire munyikaavidaasi dathasivanaabika! Sai nemijiyai mi'. Savidaasi nemi widiwo ‘Sabwi minnera maaveigi!’” ³⁹Mi'na widina kya' Jizaazai widina “‘Sabwi minnera! mudipinera! Sare' dare'nesi. Aane pwai kwai nimore yaya' widozi diraginaange' yoji maalikegaa' niminyina kayaa'na widathe mi'. ⁴⁰Sare' dare'nesi. A'mwe nemire yikamaangei mamwaalyikei neminyinelyi. ⁴¹Sare' dare'nesi. Pwai sariminyina ‘Kiraazitiyareri mijika'na aalya tika nya'ne' wijaavima!’ doziya'na niminyina yihizaavajai. Yi sahwarina nebwi yihithiwa. Gotiyai gaminyine tivikita tewaanya mujaayi yadei mika! Arikewi.”

Kayaa'nanaangebwi a'mweraavi kayaaka yadevulyira.

(Matiyui 18:6-9; Luki 17:1-2)

⁴²“Pwai kaimiraaya damili'bisamili' niminyi nyilimwaga'demili' pwarebwi kujaawa' wala'mwaake' kayaa'nanaangesira. A'mwei sara yajarina Gotiyari sinna tika naanga widavadelyira. Sinnawi sahwai pwarebwi mujaayadi'nyiyagaa' a'mwe dari maapiji kwaji sila naange' gamire tilinnyavi timupiji kwaji aalibunyavi wivaihina kyipike'na wabana yinikesira.” ⁴³Jizaazai yawiraka “Kayaa'nanya nyipidika! Dikevi nulaawipika!” daka ke'ba'na widina “Nabaai ginnya asasi kayaa'nanyabwi yiji kwaji ginnya asavi woripu'na'gi ata gavesiyaigi Gotiyarebanna jilaawade'na tewaanyasira. ⁴⁴Kayaa'nanyabwi yiji kwaji asawaalyiyaigi yaayebanna gazagaasagaa' Dike' yida'nivanikevina dulaawade'na kayaa'nanaangesira. ⁴⁵Nabaai ginnya sivilyasi kayaa'nanyabwi yiji kwaji woripu'na'gi sivila gavesiyaigi

Gotiyarebanna dulaawade'na tewaanyasira. ⁴⁶Kayaa'nanyabwi yiji kwaji sivilyawaalyiyaigi Dikevina dulaawade'na kayaa'nanaangesira. ⁴⁷Nabaa'i ginnya tinnyalyi kayaa'nanyabwi yiji kwaji ginnya tinnyai galajiwa'mwanna'gizi tinna gavelyiyaigi Gotiyai maremwaaidevanna dulaawade'na tewaanyasira. Kayaa'nanyabwi yiji kwaji tinnyaraalyiyaigi Dikevina dulaawade'na kayaa'nanaangesira. ⁴⁸Dika savi yuyagaa' gumilika gilaayang'i tika nadivisa mabalyi yipi'dengira. Dika myigaakuri yadesira.

⁴⁹Sare' dare'nesi. A'mwera Gotiyare yagaalya' wi'nadivisara tewaanna mwaabi'dere. Kayaa'nanyabwi dike'bisabwi kyima'noji Gotiyare diraginyabwi kujaavoji diraginya tewaanna mwaabi'dere. ⁵⁰Saalya' nawi'nyasira. Sa'na saalya' giringwita yima'noji nawi'nya ayina gara yadevaka? Aawa. Nawi'nya mima'nyi yadesira. 'Nemi saala giringwisa'bisaina nyima'naadika!' dapiji nayaa dimwaalyidera. Gazaizai gaminyi pwarina kwaamu'na mwaalana!"

A'mwera a'mwamarya wasi'divisabwina wijiwaaka' Jizaazai.

(Matiyui 19:1-12; Luki 16:18)

10 ¹Sabadaasai sai Kwaaka Juthiya wawilavaka Aalya Jothani ga'mavaka kwaaka saba kamwaala' gaminyawi kwala bwa'naanya mwaaidapi wijiwaakadevaai' aya kini nayaa wijiwaakina. ²Sara wijiwaakina yadaa'nyi Periziya pwara wilaabeva "Sahwai kayaa'nanya' yana!" deva yaamiji yiwaara'na "Pwai gannya balaangevi wasi'naja' sabwi tewaanna yadevwi daaka? Kayaa'na yadevwi daaka?" ³Sara yiwaara'na kye' widina ⁴"Savine' Ne Mozizai sirinimaangeraavi yagaala berivi wijaihilaka?" Sahwara widina "Mozizai da' dini' 'A'mwe pwai yawiroji "Ninnya a'mwe' wasi'nima!" dozi pikariyikwiavi yagaala sa' yidavoji gannya balaange' yunakunyavi wasi'nadelyira.'" ⁵Sara widina kye' Jizaazai widina "Sarimire simunyangi galarilavimwaaiahinyina yiwaata sabwina kiwinya sa' Ne Mozizai dinikesira. ⁶Dinike' sinnawi sagaa' Gotiyai yuya wakyaakegaa' Gotiyare yagaala dini' 'Gotiyai kwalyalyi gannya balyasi yavikaryaake'na ⁷a'mwe pwai ganimaangelyi ganaangesi sawaari yagalya'makuna yoji a'mwe' maarina yoji ⁸gamire a'mwesi mwaalina yakiriyagaa' kiyoi avaalyawaalyi. Kilaaka gaveji' yima'nikadewaalyi.' Sa' dinike'na a'mwe pwalyi a'mwe pirisi sawaai mika. Aawa. Kilaaka gavejisiyawaalyi. ⁹Sarevidaa'nyi Gotiyai kilaaka gavejisiyawaari wakake'na kwalaangei gannya balaangevi mwasi'nannesira."

¹⁰Salyi gamirerari angevi bulamwaaina kye' gamirera a'mwevi wasi'nya'na yiwaara'na. ¹¹Savine' yiwaara'na kye' widina "Pwai kwai gannya balaangevi wasi'noji a'mwe mudikevi kamaaroji Gotiyai wanganoji 'Gannya balaanga ayavina a'mwe mudikevi ata

limwamwakelyira,' dathelyira Gotiyai. ¹²Nabaai a'mwe' gannya kwalaangeri byenida'makwalyuna yaja' a'mwe pwari kamaa'noji 'Gannya kwalaangerina a'mwe mudikeri ata limwamwakesira,' dathelyira Gotiyai."

Jizaazai kaimiraayangina tewaanna wida'.

(Matiyui 19:13-15; Luki 18:15-17)

¹³A'mweyura "Sahwai ata yimetavana!" deva gaminyawinna kunnya kaimiraayaraavi makabina kye' gamirera maanga widina "Mipinera!" ¹⁴Jizaazai dara wanganake! "Ai, nimirera maanga duthivanigava!" Daka sinna tika kudava' widina "Niminyawinna kaimiraaya bipika! Kuminyina kaanya maribinera! Sare' dare'nesi. Gotiyai maremwaadeva pwara kaimiraaya darabisara Gotiyari limwadivisara mwaabi'dengira. ¹⁵Nebwi yihithiwa. Pwai kwai 'Gotiyareba mwaalima!' dazai 'Kaimiraayai Gotiyari yilaaya yadeibisainyi yima'niwijainyi,' maji kyori Gotiyare maremwaade nawi'nyaba mulaabi yadelyira. Arikawinyira." ¹⁶Sara widaka kaimiraaya gannya asawaalyi muji'na yaka ata yimeta'na yaka "Gotiyai giminyi tewaanna gyathelyira," widina widina ya'.

A'mwei gilyivita naangejiyarinesi.

(Matiyui 19:16-30; Luki 18:18-30)

¹⁷Angebadaasai kwaakaanya wodaanyi a'mwei gaminyawinna kaanyave'na wawaka "Naangelyira," daka kwadaai gilaka yiwaara'na "Nejiwaakadinya tewaanyaigi, 'Gotiyare yuyagaa' yuyagaa'ne gaalyabwi maarima!' da'muji gara yideinyaka?" ¹⁸Sara widina kya' Jizaazai widina " 'Tewaanyaigi,' nyidiwaanya' baa'na nyidiwaa? Pwara kayaa'nanyara, Gotiyai gavei tewaanyalyira. ¹⁹Yagaikiwinya dara yawi'mwaa. A'mwe maramakinna! A'mwengi ata malimwadinna! Kuka minna! Kwaasi yagaala majalikurakinna! Kwaasiya ya'gizi pwarengi kuka mamaa'dinna! Gimaamaangelyi gwaangesi gizikaja sara jithengira. Kirimire yaya' dimakila!" ²⁰A'mwei sare wi'naka widina "Nejiwaakadinyaigi, yagaikiwinya sangi kawen'yagaa'daanyi sara mididinyainyi." ²¹Widina kya' Jizaazai wanganaka gaminyina wivu'nakeri widina "Gave piri'na gihainivani!. Wawa'gizi ginnya gilyivisa yaasa'gizi nigwia maara'gizi gilyivi'maayaraavi yanga wijaava'gizi Gotiyareba warade gilyivisajiyai nyimidinaadeiginyira." ²²Sara widake'na a'mwere kale wiadaanyi "Aala," dina jikurya yaka kavena wina ya'. Sare' dare'nesi. Gamire gilyivita kwalaalya kininnakelyi. ²³Mi'na wina kya' Jizaazai a'mweraavi maranganaka gamireraavi widina "Gilyivikiraya naangejiyara wawinya naanga yina yina yipijara kwaji Gotiyai maremwaadeva tewaanyaba kupidikerera." ²⁴Sara widina kya' gamirera atika maru'nakulina. Atika maru'nakulina kye' Jizaazai ayina ma'maa'na "Kaimiraayaihi,

Gotiyai maremwaaidevanna wilya'na wawinya naangesira. ²⁵Langa lilitavalo'ma'nikeriki jilikyaawarya kaameliyai wilaawade'na wawinya maalikesi. Gotiyai maremwaaideva gilyivita naangejiyai wilaawade'na wawinya naangesira.” ²⁶Sara kuda' atika maru'na'muluna yeva dinyina “Gotiyarebanna aai yilaawadevanaka? Aari padaihasamaadelaka?” ²⁷Dinyina kye' Jizaazai kuminyi tinna wanganaka widina “A'mwera yapi mulaawi yipi'dera. Aawa. Gotiya gawei kyoji wilaawipi'derera. Sare' dare'nesi. Gotiyai yuyanna yadelyira.” ²⁸Pitai sari gaai widina “Yithaa, nemi yuyangi ya'mawakona gimidinaabiho.” ²⁹Sara widina kya' Jizaazai widina “Nebwi yihithiwa. Aane pwai kwai niminyine'naji yagaala tewaanya'naji gannya ange' gya'mwera gya'mwe ganaange' ganimaangei gannya kaimiraaya gannya wawinya ya'mawakoji ³⁰kiri' dahaasagaa' anga kwalaalya, gya'mwe kwala naange, ganaanga kwalaalya, kaimiraaya kwala naanga naanga, wawinya naangeva' mamaari yadei midaaka! Kwaaka davaki naanga naanga maarade kiri' niminyine'na pwara taanginya wijaavipi'de divi yima'nadehaa' Gotiyare nawi'nyaba yuyagaa' yuyagaa'ne gaalyabwi maaradelyira. ³¹Sa'na Kwaaka davaki pwarina ‘A'mwe sinnawinyalyira,’ dimanigasarina Gotiyareba ‘O, aayaangemilikira,’ dinipi'delyira. Yi pwarina ‘A'mwe aayaangemiliki,’ dimanigasarina Gotiyareba ‘O, sinnawinyalyira,’ dinipi'delyira. Yi kwalaalyaraavina sara dinipi'derera.”

Dahasaai dahaa' Jizaazai gannya baryagaa'na wida'.

(Matiyui 20:17-19; Luki 18:31-34)

³²Jeruzaaleminera tusavi kaanya widawadaapi Jizaazai kaanya wodaa'nyi pwara “Sabannei lika myiwaka,” deva atika maru'nakulina yeva midinna yesara lika yina. Lika yina kye' sai gamireraavi piba wimwaaihaka gaminyina yima'nya'ne'na widina ³³“Yithaanyi! Jeruzaalemineina yimanaawigo. Saba A'mweraavine Kaimiraayainyi maarapi sipizipiya Gotiyarina yira'divita naangeraji yagaikiwizaraji saraavi kanyimarimwaaihori a'mwe sara niminyina ‘Sai baladelyira,’ jidavapi anga naanga pimaginyaraavi (Romi mwaalyaraavi) nyimarimwaaihipi'derera. ³⁴Kanyimarimwaaihapi birala nyapiri maagwala nyopwasi'napiri lannaka wilyabaalyi mala nyiramapiri nyiramakipi'deinyi. Kabala'muri yirika daryaa' dari' kwawilavoji kwaihwaainakeinyi ayina dikaavideinyira.”

Jemizalyi Joniji kidaraai Jizaazari yidaanganagi.

(Matiyui 20:20-28)

³⁵Sagaa' Jemizalyi Joniji kidaraai Sevathiyare gawaali' kwaraai saryawinna wilaabahila widina “Nejiwaakadinyaigi, githakade' naariminyine'na sara jitheinaalyira. Sara yawi'mwoi.” ³⁶Mi'na widina kyagi widina “Kiriminyina baari' yijiwa?” widina ya'.

³⁷“Naariminyina tewaanyaba maremwaaala'gizi gimire byaannakevi 'Pwaigi aangasavi pwaigi kwanaamevi namwaalyita nawi'nyawaari kwalamwaalakilyi nemi maremwalaadeinera,' sara nehithana!” ³⁸Sa' widina kyagi Jizaazai widina “Nyidaangamanigilya' myawiriwaai. Daanga nyivinade'na kaapiya sa' dinyideraaihi daaka? Nabaai daanga kihivinoji diraginyaraaihi daa'? Nimire kilaaka yuyajiki daanga nyivinade'na nimire bavitaaziya' nyima'nadesireva nabaai kirimire kilaaka yuyajiki daanga kihivinoji kirimi diraginna dimwaalyideraaihi daaka?” ³⁹Sara widina kya' widina “Naarimi diraginyainaai wikira. Wi'na yakaneinaalyi.” Jizaazai wida' “Kaapiyavi aalya nide' savi aalya dinyideraaihilyi. Niminyi bavitaaziya' nya'de' kiriminyi yihwaradesi. ⁴⁰Sare kiri' nimire aangasaviji nimire kwanaameviji walamwaalya'na ninnya wawinya' daaka! Aawa. Gotiyai yawiroji gami sahwai namwaalyita nawi'nyawaai yovirawakyaakewaarina pwaraari wimwaaihatelyira.”

⁴¹Gamirera pwara atiraalyara sadaraai widahilya' wi'nyina kye' Jemizalyi Joniji sadaraarina sinna tika widavina. ⁴²Sinna tika wida'daa'nyi Jizaazai wijivwaramaa'na “Yuyaihi, kaajila!” widina “Ajimya yuyangiyaraavirebwi yawi'mwaa!. Ajimya yuyangiyaraavi maremwaaividisara 'Nemi a'mwe naangeinera,' didivi' a'mweraavi marulawakina yadivi' mwaiiha'. Nabaai kumire a'mwe naangera kuminyi diraginna yadivisarera. ⁴³Sabwi mipinera! Sarimijiyai pwai 'Nimi a'mwe naangeinyi yima'nima!' yawiroji pwaraavi widaayoji a'mwe naangei yima'nadelyira. ⁴⁴Pwai kwai 'Pwaraavine sinnawinyainyi yima'nima!' yawiroji pwaraavire yaasiwa'wawinyai yima'noji sinnawinyai yima'nadelyira. ⁴⁵Sare' dare'nesi. Sahwainyi A'mweraavine Kaimiraayainyi pwara nyidaayipi'de'na mabyiwa. Aawa. Pwaraavire widaayide'na biweinyi. A'mweraavire kayaa'nanyabwina mubya'na kabala'muji a'mwera tewaanna mwaaibi'de'na biweinyi. Kwalaalyaraavina a'mwaminigwiainyira.”

Jizaazai tibinyari tewaanya yavada'gala'.

(Matiyui 20:29-34; Luki 18:35-43)

⁴⁶Anga Jeriko yi'mavaaweve sahwalyi gamirerari kwala bwa'naanyasi sara Jeriko ya'ma'daapi Baatimayaazai, Timayaazare gawaali, tibinyai a'mweraavi “Nigwia nyijaama! Tibinyainyi,” dadei tu'maangebaari mwaalina. ⁴⁷Mwaalina yaka dara wi'nake! “Jizaazai Naazareti mwaalyai daaka!” Daka jaka widina “Ne Devitimireigi, Jizaazai, niminyi kale dinyigaimwana!” ⁴⁸Sara jaka widina kya' pwara maanga widina “Madinna! Kave dimwaala!” Maanga widina kye' kiri' jaka naanga naanga widina “Ne Devitimireigi, niminyi kale dinyigaimwana!” ⁴⁹Jizaazai sara wi'naka mudaraka pwaraavi widina “Niminyawinna duzivwaramaarila!” Mi'na widina kya' sahwara tibinyari

jaka jivwaramaa'na, widina “Wikira. Jivaimwanna! Gizivwaramaa'mwake' yarai dithikaaka!” ⁵⁰Widina kye' gannya yivita tapalasi'naka yarai dikwosi'nadaavaka Jizaazaryawinna wilaabina. ⁵¹Wilaabina kya' Jizaazai widina “Giminyina beri' yijiwa? Gara yawi'mwaa?” Tibinyai widina “Naangeigi (Ravuni), ‘Nimi tinna wanganima!’ dena githiwa.” ⁵²Sara widina kya' Jizaazai widina “Niminyi nyilimwamwaanya'na gimire tinnyaraai tewaanya yana! Kaanya diwona!” Sara widina kya' gamire tinnyaraai tewaanya kyima'na' tusavi Jizaazai kwawa' a'mwei midinna ya'.

Anga Jeruzaalemi Jizaazai tewaanna wilaawa'.

(*Matiyui 21:1-11; Luki 19:28-40; Joni 12:12-19*)

11 ¹Jeruzaalemi adaihisaba Anga Bepaaza Anga Betaani mannikeba Mugunya Wolivi yi'ma'na kye' gamire pwaraari widaasina ²“Angeba sakyiri' sakyaba wilaawakilyi yime'nya'bi' dogiya naanga saadiwinyai wila pwekinikeri wanganakilyi dogiyari a'mwe aane pwai kwai milamwaalyari wila yaarakilyi niminyawinna dimakabyila! ³A'mwe pwai kwai ‘Sabwi baa'na yivanigi?’ yihithaza' dara duzila! ‘Naangei sarina kugainivanikira. Nabaai mi'na kyoji sagaa' yime'nya'bi' dogiyari ayina maryasaabathelyi.’” ⁴Mi'na widaasina kya' saraai kaanya wawagila adusavi dogiya naanga saanyai tikuryaba mwasawi wila pwekinikeri wanganagila wila yaarina. ⁵Wila yaarina kyagi saba pwara daavina yeva widina “Baari' yivanigi? Diwinya sari baa'na yaa'manigi?” ⁶Sara widina kye' saraai Jizaazai widake' kudahi “Wikira. Dimakwila!” ⁷Sara widina kye' Jizaazaryawinna dogiya saanyari makabina kyagi yivita mararaapaleva dogiyari yilakina kye' sahwai yivisikaavi a'ba yilamwaaina. ⁸Sara yilamwaaina kya' a'mwe kwalaalyara “Sahwai naangeri yilaaya yaana!” dinyina yeva kunnya yivisa tusavi marakina kye' pwara “Tinna tewaanya wanganya'nengi,” deva taanya kiwa'nake peda'na yeva tusavi nayaa marakina. ⁹Nayaa marakina kye' sai yilamwaaidi'nyi sinnawinyaraji diviyaraji sara yilaaya yeva jaka widanganna “Naangeigi, Gotiyai padaihasamaarana! Gotiyai Naangei githasaabake'na gaminyine yayavi biwaanyaiginyi tewaanna gizaavana! ¹⁰Sinnawi Ne Deviti tewaanya nemaremwalyaakabaabib! Gotiyarina dinemaremwaala! Maremwala savi Gotiyai tewaanna wiana! Menya ke'mwewinyaigi dinevadaihasamaaka! Su! Su!”

¹¹Sai Anga Jeruzaalemi wilaawina yaka Gotiyare angevi wilaawaka saba yuyangi tinna wangamabina yaka sagaa' sawisirina mena yima'nakegaa' Betaani anga maalikevina gamirera atiraai sivilyiridaa'nyi pwaraalyaraji kaanna wina ya'.

Jizaazai yita pihiyari wida'.

(*Matiyui 21:18-19*)

¹²Mwanyavi dikaaveva Betaanidaasara wodaapi gaminyi mijika wina. ¹³Mijika wina yadaa'nyi keiba yita pihiyai kiwa'nakeri tinna wanganaka

“Yisilya daaka?” daka kaanna wina. Yisaryabanna baka sagaa' dara wanganake! “O, kiwata gave daaka?” Sare' dare'nesi. Yita yuya yisila mya milyadi'nyi. ¹⁴Daka yisari widina “Yisimaayaigi yuyagaa' aane pwai kwai gimire yisila manyi gyatheiginyi.” Sara widadaasi gamirera wi'nyina ye!

Jizaazai Gotiyare Angevina wawa!

(Matiyui 21:12-17; Luki 19:45-48; Joni 2:13-22)

¹⁵Jeruzaalemina yi'mavaawina kye' Gotiyare angevi saba Jizaazai wilaabina yaka yaasaraavi maririgalaasina ya'. Nigwia yanga yinya'neraavire yi'binyangiji kwaamirya yaasadivisaraavire namwaalisangiji marapuratawasi'na yaka ¹⁶a'mweraavi widina “Gotiyare anga davi aane pwaigi kwaigi gilyivisa mamwa'nalota'dinnera!” ¹⁷Sara widina yaka wijiwaakina “Gotiyare bukuya' dinike' 'Gotiyai dara widake'na daaka! “Nimire ange' tibariyagaala ja'nesira. A'mwe ajimya yuyangiyara angevi wilaabapi tibariyagaala nyidipi'desira.” ' Sara dinike' pwara wilaabina kyiwaa' sahwaravire nigwia mwagi'nya'neba daa dava!”

¹⁸Sipizipiya Gotiyarina mubithika yira'divita naangeraji yagaakiwjaraji sara wi'nadivi' Juya naangera gaminyina “Balade'na gara yaadeinaavaka?” dinyina. Sare' dare'nesi. Sahwarina lika naanga yesa'nanyi. Sare' dare'nesi. Kwala bwa'naanya' wijiwaakiyagaalya'na atika maru'na'muluna ye'. ¹⁹Sara dinyina kye' sawisa' kajinna' angebadaa'nyi salyi gamireraji bwalaawina ye'.

Yita pihiyai wijiwaakya'nesira.

(Matiyui 21:20-22)

²⁰Mwanyavi tusavi kaanya wodaapi yita pihiya' pwipulyaji taanyaji yuya yawaka balake' tinna wanganna. ²¹Tinna wanganna kye' Pitai mi'na yawiraka sari widina “Nejiwaakyaigi, dangana! Yita pihiyai yagaala diraginya' widiwa'dinyai mena baimwaka.” ²²Widina kya' kuminyi widina “Gotiyari dilimwagarila! ²³Nebwi yihithiwa. Pwai mugunya' widozi 'Mugunyaigi dikaava'gizi saalaalyavi divaihinana!' Nabaai gamire simunyavi 'Mugunyai sara yadelyira,' kalimwagaroji Gotiyai gaminyina sara yadelyira. ²⁴Savine'na yihithiwa. Tibariyagaala duthathe ginnya simunyavi 'Gotiyai mena sara nyijaawa!,' kada'gizi gizaavadengira. ²⁵Tibariyagaalya'na daava'gizi yawi'diza' 'Ai, pwai kwai kayaa'na nyiwaka! Sinna tika nyida'mwa!, sagaa' 'Gamire kayaa'nanya' mi'na marasi'niwa,' jawika! Nabaai Gimaamaangei Sigunyavi mwaalikei gimire kayaa'nanya marasi'nade'na sara ja! ²⁶Kiri' pwara kayaa'na gyiwaasa'na kumire yiwetawakya mamarasi'nyi yija', yi gimire yiwetawakyanna Gimaamaangei Sigunyavi mwaalikei mamarasi'nyi yadelyira.”

Jizaazare diraginya' aai wijaava'?*(Matiyui 21:23-27; Luki 20:1-8)*

²⁷Jeruzaalemina ayina wilaabina. Mi'na wilaabina kye' sahwai Gotiyare angevi kaanya bulayamaryadaa'nyi gaminyawinna sipizipiya Gotiyarina yira'divita naangeraji yagaaikiwiaraji a'mwe naangeraji wilaabeva ²⁸widina “Sa be diraginya yawaaihinyavaka? Yawaaihinya'na sa ya'neiginyi diraginya' aai gizaavakasiyaka?”

²⁹Jizaazai sahwaraavi widina “Yagaala piri' yihiihaaravima! Savi kaja'nanyidapi sara yawaaihe'ne diraginya' yihiziwaakideinyira. ³⁰Joni aalya bavitaazyabwina Sigunyavidaasi Gotiyai duziwaakaka? Kwaakevaki a'mwera duziwaakeva? Diza'nanyijila!” ³¹Sara widina kya' yagaala dinyina “‘Sigunyavidaasira,’ kudawaaji ‘Joni niminyina wijiwaaka’. Baa'na mu'nyetaihilaka! nanedathika! ³²Sare' kiri' ‘A'mweraavidaasasi,’ madaanna! Kwala bwa'naanya' nanerabika! Sahwaraavina lika yadaa mwaiho.” Sare' dare'nesi. A'mwe yuyara yawi'na “Nebulyasi. Joni Gotiyari wi'nanejiwaakadelyi.” ³³Sara dinyina yeva Jizaazari ma'maa'na “Sa'na myawirivanigo.” Jizaazai widina “Nabaai manyijivanigasa'na nimi yawaaihe'ne diraginya'na mihiziwaakiwinesi.”

Waainiwila wawinyavi yadivisaraavinesira.*(Matiyui 21:33-46; Luki 20:9-19)*

12 ¹Sahwai ke'ba'na widina “A'mwe pwai wawinyavi giraipizila maarya'na burinna ya'. Sai kurita yavikaryaka giraipiwila buridaka kavi'ninnyavi giraipizila mwa'mwagikya'ne' likaka anga maaliki' wawinyaba banganarya'ni' madina. Mi'na madina yaka pwaraavi wida' ‘Nimire wawinya' maremwaalapi giraipizila pini yihizaavide.’ Sahwara wawinya' kamaremwaale' a'mwe sai kwaaka pibanna kaanna wina. ²Kaanna wina kya' giraipizila mya yakegaa' sai gannya wawinyawinna widaayaderi wawinyavine sila pininna widaasina. ³A'mwe widaasina yakei kaanna wina kya' wawinya' maremwaaidivisara widaayade sari galalimwanna yeva mala wirameva ayina wawinya' gyakwaryawinna simaayari widaasina. ⁴Sara widaasina kye' gyakwai widaayade pwari widaasina kya' gamire minyaginyavi kayaaka yeva birala yina. ⁵Sara kye' widaayade pwari widaasina kya' sari mena tamakeva widaayade pwaraavi widaasakeraavi pwaraavi mala tamina yeva pwaraavi mena tamakina ye'. ⁶Sara kye' wawinya gyakware pwai gawaalivaangei yilaaya wimaryadei kuna mwaala!. Ganimaangei daka ‘Nyibwaalivaangerina tewaanna yawipi'derera,’ daka widaasina. ⁷Widaasina kya' widavadaa'nyi wawinya' maremwaaidivisara tinna wanganeva dine! ‘Sai gawaali' divi ganimaangere yuya maaradelyira. Yarala, tamakawaaji gamire wawinya'

namaaradi'de'na maraadeinera.' ⁸Sara dinyina yeva galalimwana yeva tamakina yeva giraipiziwawinyavidaa'nyi marasi'na ye'.

⁹Giraipiwawinyavi naangei beri' yadelaka? Sahwai wilaabozi a'mwe saraavi kayaaka wigalakoji a'mwe pwaraavi 'Sarimi nimore wawinya' dimaremwaalyideihilyira,' widathelyi. ¹⁰Gotiyai dinike' pikariyikwia tinna mwanganyi yadivisa' daaka?" widina ya'. Widina yaka sahwai yawi'na "Silaangeinyira," yawiraka widina "Dara dinike'

'Anga madivisara silaangeri wanganeva
"Kayaa'nanyai," dineva marasi'na yesai
Simijamaanga nawi'nyai yima'nyina ya'.

¹¹Gotiyare sara wakina yake'

Tinna wanganona "Tewaanya," dino.'

Gotiyare bukuya' sara dinikesi." ¹²Juya naangera dara wangane' "O, neminyina ke'ba'nanya' duthiwaka!" Deve'na "Jizaazari wila yirakaana!" dineva kwala bwa'naanyavina lika yeva gaminyawi yagalya'mavaawina ye'.

Taakiziyagaalya'nesira.

(Matiyui 22:15-22; Luki 20:20-26)

¹³A'mwe naanga sara Periziya pwaraji Erotiyare pwaraji saraavi widaasina "Jizaazai kayaa'na widathe'na diwila! 'Kayaa'na kudozi kalavuzavi wimwaihaana!' dapiri diwila!" ¹⁴Sara widaasina yesara kaanna bina yeva widina "Nejiwaakadinyaigi, 'Nebulya' dade' midaaka!' gyawi'mwo. A'mwe aane pwai kwai giminyina divanike'na lika myivanigi. Sare' dare'nesi. A'mweraavire sinna gavevi tinna mwanganyadinyaiginyi. Aawa. A'mwe naangeraaviji a'mweraaviji avaa'ina widadi Gotiyarebwi gavebwi nayaa wijiwaakadinyaiginyira. Romi maremwaaidei Sizaari taakiziya wijaaya'na nimore yagaaiwinya beri' dinikavaka? Tewaanya' daaka? Aawa daaka? Taakiziya wijavaadeina daaka? Mujavaanneina daaka?" ¹⁵Sara widesara kwaasi yagaala widesaraavina yawiraka widina " 'Sahwai kayaa'nanyabwi yana! yawireva yaamiji baa'na nyidiwaava! Mone' tinna wanganya'neinyi dinyimaryaama!" ¹⁶Widina kya' mi'na makabina kye' widina "Pikizaaya dasi pikarya daji aaihwarengaka?"

¹⁷"Maremwaaidei Sizaarengira," wide' sahwara. Sara widina kye' Jizaazai widina "Sizaari Sizaare ayina duzaayila! Gotiyari Gotiyare ayina duzaayila!" Sara widina kya' gaminyina "Nawi'nyabwina dadele!" dinyina ye'.

Baryara ayina kwaihwainakera dikaaya'nesi.

(Matiyui 22:23-33; Luki 20:27-40)

¹⁸A'mwe Sazuziyara, "A'mwera kabalapi yuna madikaayi yipi'dera," yawiresarajiya pwara gaminyawinna beva yiwaara'na

19“Nejiwaakadinyaigi, Ne Mozizai nedinike! ‘A'mwe pwai kware gya'mwei balajai kaimiraavimaayai a'mwevi kwasikwoja! a'mwei a'mwe savi maaroji kaimiraaya maryawakinna, yaya! baryarine! widina yadengira.’ 20 Sa'na dinike! a'mwe ata puridaasi pwaraalyadaraka mwaale!. Kamwaale! siraangai a'mwevi maaraka kaimiraavimaayai gamire sigigwa'jikerinei kunei bala!. 21 Kabala! diviyai a'mwe savi maaraka kaimiraavimaayai bala!. Kabala! diviya pwai avaa'ina ya!. 22 Sana sana yuyara ata puridaasi pwaraalyadaraka a'mwe savi maareva kaimiraavimaayadaraka bale!. Kabale! aayagaa! a'mwe sa! bala!. 23 Dikaasagaa! sahwaraavi kyidikaavoji a'mwe gaware! mwaaladevaka? Sare! dare'nesi. Ata puridaasi daraalyara yuya sadaraka balaanga sa! maaresa'nanyi.” 24 Sara yiwaara'na kye! Jizaazai widina “Sarimire simunya kayaa'na yawi'maniga!. Gotiyare bukuyasi Gotiyare diraginyasi myawirivanigasavi kayaa'na yawi'manigasa'na midaaka! 25 Sare! dare'nesi. Baryara dikaapi'dehaa! a'mwera a'mwengi maa'arina, a'mwe a'mweraavi maa'ny'i yipi'dengi. Aawa. Sigunyavi balaangengi maa'yadivisara maa'yara mwaaihatabaaibisarera. 26 Nabaai baryara dikaapi'de'na Ne Mozizai yidayaake! yisi! dika nyaake! yagaalyavi mwanganyijeva! Yisikidaasi Gotiyai Mozizari wijaa! ‘Dahaa! Eviraamimire Gotiyainyi. Dahaa! Aazakimire Gotiyainyi. Dahaa! Jaikopimire Gotiyainyi.’ 27 Mozizai sara yidayaake! a'mwera baleva Gotiyareba mwaaihasa'na Gotiyai widina ‘Kumire Gotiyainyi.’ A'mwera yawi'na ‘O, a'mwe bainikera.’ Kiri! Gotiyai yawi'na ‘Niminyine'na gaala mwaaihasara.’ Sarimire yagaala kwaasi yagaalyasira,” widina ya!.

Yagaaiwiwinya naange'nesira.

(Matiyui 22:34-40; Luki 10:25-28)

28 Yagaaiwiwija pwai baka dinyina yesa! wi'naka dara wanganake! “Sahwai nayaa duthivanika!” Daka yiwaara'na “Yagaaiwiwinya kwalaalya wari!. Yagaaiwiwinya aaya sinnawinya! berivaka?” 29 Jizaazai ja'nawidina “Yagaaiwiwinya sinnawinya! dara dinike! ‘Yizirelyaihi du'ny'i! Naangei nemire Gotiyai Naanga gave pwainanyalyira. 30 Naangei gimire Gotiyarina naanga givu'nana! Gimire simunya yuyaviji gimire kurya naangeinaji gimire yawita yuyangiji, gimire diraginya yuyangiji Gotiyarina naanga givu'nana!’ 31 Yagaaiwiwinya aya kiri! dara dinike! ‘Gimi saigi giminyina kale gyivanike! a'mwe gimire angeba mwaalikerina sara kale gyana!’ Yagaaiwiwinya dawaai naangewaalyira. Yagaaiwiwinya aane piri! kiri! yuya sawaari wavila'manika piri! mi!” 32 Sara widina kya! Yagaaiwiwijai widina “Nejiwaakadinyaigi, tewaanya diwaana. Nayaa diwaa ‘Gami gave pwainanyalyi. Gotiya aane pwai kwai mamwaalyi.’ 33 Gaminyina simunya yuyasi, munyi! yuyisi, yawita yuyasi, diraginya yuyaji, naanga nevu'nade'na tewaanyasira. Nabaai

neminyina kale neyivanike' a'mwe nemire angeba mwaalikerina kale sara neyana! Sa' tewaanyasira. Sawaai naangewaalyira. Gotiyarine sipizipiya bulimakaawoya yuyara dika nasi'na yadeji yuya yanga wimaarina yadaanyaji sa maalikengira.”³⁴ Sara widina kya' Jizaazai dara wanganake! “Gami sai tewaanya dathivanika!” Daka widina “Gotiyai maremwaaideva maavewi mamwaalyigi.” Sara widina kya' a'mwe aane pwai kwai myawiramaari “Nimi lika myivanige. Yagaala pini yiwaaravideinyira,” myawiramaari ya'.

“Kiraazitiyai aaihwilaka?” Jizaazai wida'.

(Matiyui 22:41-46; Luki 20:41-44)

³⁵ Gotiyare Angevi Jizaazai wijiwaakakei widina “ ‘Kiraazitiyai, Gotiyai widasaabathei Ne Devitimi Gawaalikira,’ Yagaaikiwijara sara be'na widivanigava? ³⁶ Gotiyare Kuryari Deviti sahwai pikarya yidayaa'

‘Nemire Naangei nimire Naangeri wida'

‘Naarimi yuyaraavi maremwaalakadeinaalyi.

Nimire aangasabanna dimwaaideiginyi.

Gimire sivilyiraari yikamaangeraavi marulawakidehaa'nanyi.” ’

³⁷ Deviti sahwai Kiraazitiyarina ‘Naangelyira,’ sara dinike'na gamire gawaalivaangei gara mwaalika!” Sara widina kya' kwala bwa'naanya wi'neva yilaaya ye'.

Yagaaikiwijaraavirebwi.

(Matiyui 23:1-36; Luki 11:37-54; 20:45-47)

³⁸ Sara wijiwaakina “Yagaaikiwijara pwaraavirebwi mipinera! Mala nayaa jiwannyila! Kumi sara yilaayabwi ‘A'mwera yawipika! “Sara sidu'nakera mwaaihava!” ’ deva yivita gaala saaminyai' marabwaayeva kaanya yamaryivanigasabwi. Mubyabanna a'mwera ‘Naangeigi. Tewaanyaigi,’ widivanigasabwi. ³⁹ Lotuangevi naangeraavire namwaalyisangi mwaaimanigasabwi. Tika munnegaa' nawi'nyaba gaveba nivanigasabwi. Sabwina yilaaya marivaniga'. ⁴⁰ Sara yivanigasara yaanyiwaakengire angengi kuka yuna maa'manigasara. A'mwera ‘Kumi sara tewaanyarera,’ yawiryana'nera tibariyagaala naanga kwaasi widivaniga'. Sara yivanigasaraavi Gotiyai naanna jidavadera daanga naanga wivinanderera,” widina ya'.

Yaanyiwaake' Gotiyari nigwia wijaava'.

(Luki 21:1-4)

⁴¹ Gotiyare angevi nigwia wakya'neba aya kiba Jizaazai mwaalaka a'mwera nigwia wakesangi tinna wanganna. Tinna wangadaa'nyi a'mwera gilyivita naangejiyara nigwia naanga kwake' ⁴² yaanyiwaake' gilyivi'maaya' baka nigwia maalikikaai wakina. ⁴³ Sara wakina kya' sai

gamireraavi jivwaramaa'na yaka widina “Nyu'nyila! Nebwi yihithiwa. Yaanyiwaaka gilyivi'maaya da' Gotiyarina naanga wijaawaka. Pwara maali'na wijawaava. ⁴⁴Sare' dare'nesi. Sahwara nigwia naange wakiwaasa Gotiyai wanganaka nabaai nigwia naanga naanga kumire angengi kuna warike wanganaka divani! ‘Yanga maalikesira.’ A'mwe' nigwia maalikikaai wakiwakevi Gotiyai wanganaka dara wangamwake! ‘Ai, a'mwe sa' wigainiwake' gannya yuya dakiwaka! Nigwia pini wapaaya mubya'na mwarijika!' Daka divani! ‘Yanga naangesira.’”

Gotiyare ange' kayaaka yinya'ne'na widake'nesi.

(Matiyui 24:1-2; Luki 21:5-6)

13 ¹Sai Gotiyare angevi bwalyodaa'nyi gamire pwai widina “Nejiwaakadinyaigi, dangana! Sila anga tewaanya sangi dangana!” ²Jizaazai widina “Anga tewaanya dangi mwanganyijivanigina? Silaanga a'ba yila'di'nyiya' kunewi mwari yadesi. Arikewi. Yuya wo'dalayiwinasipi'dengi.”

Daangegaa'nesira.

(Matiyui 24:3-14; Luki 21:7-19)

³Divi sagaa' Mugunya Wolivi sai mwaaidi'nyi Gotiyare Ange' pihiri mannadisi wangadaa'nyi a'mwera mamwaalyaba Pitalyi Jemizalyi Joniji Ediruyalyi sara yiwaara'na ⁴“Dinedana! Diwaanya sa' Gotiyare angevina gathihaa' yima'nadevaka? 'Jizaazai sara nedake' yarai yima'naabazi!' be wijiwaainya' wanganawaaji yawiraadevaka?” ⁵Mi'na yiwaara'na kye' Jizaazai gaai widina “Sarimi mala nayaa jiwannyila! Pwai kwai kwaasi yagaala nayihithathika! ⁶A'mwe kwalaalyara niminyine yaya' maarapiji widipi'dera ‘Nimi sahwainyira. Kiraazitiyainyira.’ Sara kadapiji a'mwe kwalaalyara ‘Nebulyasira,’ dapi kuminyi a'mwe kwaasiyaraavi midibi'derera. ⁷Nabaai malyanginaji malyangine yihukyagaalyanginaji wi'napiji yawita kwalaalya mipinera! Aawa. Sa yima'nanne'na kiri! Kwaakevaki aaya' yarai yade' mi'. ⁸Sare' dare'nesi. Anga naanga pimagingyara anga naanga pimagingyara pwaraji mala bwa'nipi'derera. A'mwe naanga kingiya pwarera a'mwe naangai kingiya pwarerari mala bwa'nipi'derera. Kwalaalyaba wininya yadengira. Mijika naanga yima'nadengira. Yuya yuya sa yibwasinapi dividaasi kayaa'nanya yima'nadehaakira. ⁹Kayaa'nanyara kayaaka nayihigaibi'de'na nayaa jawirila sarimi saihi! Pwara sariminyi wila yirakapiji kaajoliyaraavi yihimaaripi'dere. Lotuangengi yihirabi'deihilyi. Niminyina Ga'maaniyaraaviji a'mwe naangeraavi kingiyaraaviji kihimwanganapiji sarimi yagaala tewaanya' nebulya'na dizalikurakyide'nanyi! ¹⁰Gotiyai yawirake'na a'mwe ajimya yuyangiyara gazabazaba mwaaihasaraavi Gotiyare yagaala tewaanya' sinnawi kujiwaakapiji divi aaya'na yima'nadehaakira. ¹¹Wila yihirapiji kotiya yadivita angevina

yihimarimwaaihya'nera kihimakabapiji sarimi yawita kwalaalya mipinera! 'Nimi gara widideinyaka?' myawipinera! Aawana. Sagaa' Gotiyai yagaalya' sara kyihizaavoji dathaza' sara duzideihilyira. Sare' dare'nesi. Sagaa' sarimi duzideihi mika. Aawa. Kurya Tewaanyai sara widathelyira. ¹²A'mwe pwai dina 'Nya'mweri tamakipi'de'nanyi,' dozi gya'mweri kotiya yadivisabanna wimarimwaaihadelyi. Nabaai ganimaanga pwai gannya kaimiraayari wimarimwaaihadelyi. Kaimiraaya pwara kuvinimaangeyuraavi kotiyabanna makuna yipi'de yuya baibi'dengira. ¹³Nimire yayavina yihyawidivi' saihirina a'mwe yuyaraavi sinna tika widavaderera. Kiri' a'mwe pwai niminyina diraginna daavajari aayagaa' gannya barya'negaa' Gotiyai padaihasamaradelyira."

Kayaa'nanaange' kayaaka yigaide'nesi.

(Matiyui 24:15-28; Luki 21:20-24)

¹⁴Yagaala da' yidavide'na nayaa jawirila! Sahwai widina "Kayaa'nanaangei kayaaka yigaidei saba madaayi yajava kadaavoji danganyideihilyi." Pikarya savi wangana'gizi Jizaazare yagaala sa' jawiramaaka! "Daa'disi Juthiya mwaalyara mugunyangina yarai likaanya wipika! ¹⁵A'mwe pwai namwaaalikwaasavi mwaalojiyai 'Angevi gilyivita kini wilamaarima!' majai yarai likaanya wina yana!. ¹⁶A'mwe pwai wawinya yivanikei gannya angevina yivita maarya'nei ayina mabannelyi. ¹⁷Dazagaasagaa', we', a'mwe kaimiraavimunnakenge! We', aamunya wijaavanigave sagaake! ¹⁸'Burike' nabwalaradika! Yirilya' nanedathika!' dapiji tibariyagaala duzila! ¹⁹Sare' dare'nesi. Sagaa'na a'mweraavi daanga naanga wivinadehaakira. Daanga naanga nevinaja sagaa' kayaa'nanyagaakira. Sinnawi Gotiyai wakyaaakegaasi kigaasi dahaa' kigaasi wila divi kigaasi daanga sabwi aawano. Arikewi. ²⁰'Yirika sa daanga naangegaa' yesimavadima!' Gotiyai yagaala sara maji yaja' a'mwe yuya kilaa'nake mamwaalyi yipi'dengira. Aawa. "Nimire dahilakiwera nabaibithika!" dena nimi yesimavadima!' Gotiyai dina ya'. ²¹Sagaa' pwai kwai githaza' 'Dangana! Dava Kiraazitiyai mwaali!', nabaai githaza' 'Dangana! Keiba mwaali!', sarimi mu'nipinera! ²²Divi kwaasi kwaasi Kiraazitiyara, Gotiyari wi'nawijiwaakadivita kwaasi kwaasiyara kumi sara kwaasi yawiradidivi' wilaabapiji dapiji 'Gotiyai dahilakakera yawipi'de' dingaka? Kwaasi yagaala wi'nipika! Kayaa'na yipika!' wijiwaainyaji atika maru'nataji kwaasi yipi'derera. ²³Sara yipi'de'na sarimi saihi tewaanna nayaa divaihanaryila! Mala nayaa jiwannyila! Divi yuya sa yima'nyina yadengina sinnawi sagaa' yihithivanige.

"A'mweraavine Kaimiraayainyi walaabideinyi," widake'nesi.

(Matiyui 24:29-31; Luki 21:25-28)

²⁴Sare' kiri' sagaa' daanga naanga wivinade sasa' tivi'na kyoji yirika sangi nyilyai muji kyoji jihinya yima'nyina, nabaai lawei muji yadelyi.

²⁵ Sigunyavidaasi silingaaminyarika piri' bwala'na, piri' bwala'na, sigunyavi diraginya warikevi wininya naange'na yima'nadesi. ²⁶ Wininya kyoji A'mweraavine Kaimiraayai yiraayavi diraginya naange', tewaanya naange', byaanna naange' wa'doziyavi kwalaabozi wangabi'delyira. ²⁷ Sahwai ejeliyaraavi widaasina 'Nimire dahilakengi Kwaakevaki yuneba pimagi pimagi akyamwidaa'nyi akyamwidaa'nyi kwala dalamari'bwaraawila!' widasaabina yadelyira."

Aayagaa'na yita wijiwaakya'nesira.

(Matiyui 24:32-35; Luki 21:29-33)

²⁸ "Yita pihiya wanganapiji ke'ba'nanya sa' jawirila! Pihitaanyavi wivya naanga kyoji sedala pwa'nyina yojiyagaa' sarimi yawi'divi' 'Pihiya' li'mwa'. Nyilyagaa' aya kigaa' yima'nadehaaki.' ²⁹ Sara yawi'divitabaabi' sarimi diwe sangi yipi'dengi wanganapiji dara jawirila! 'Gami mi'na yarai walaabathei. Tikuryavi daavi!.' ³⁰ Nebulya'na yihithiwa. A'mwe sagaa' mwaalyara kuna myimanigwiadapi yuya diwe sa yima'nadehaa'nanyi. ³¹ Sigunyasi Kwaakevasi savakaai divi sagaa' kiwawoji kiri' nimire yagaalya' yiwawode' mi!. Waragothesira."

Aayagaa'na yuyara myawiryarera.

(Matiyui 24:36-44; Luki 17:26-30,34-36)

³² "Yirika walaabide sagaa'na aane pwai kwai yawiradehaa' mi!. Ejeliyara Gotiyareba mwaihasara myawirivaniga! Gotiyari Gawaalivaangai myawirivani!. Nimwai gavei yawi'mani!. ³³ Sarimi mala nayaa jiwannyila! Sare' dare'nesi. 'Sagaa' gathihaa' yima'nade' dingaka?' myawirivanigo. Sare'na divaihanaryila! ³⁴ A'mwe daibisainyira. A'mwe sai piwinnei gannya wawinyangi widaayadivisaraavi maramwaihina kumire wawinya'na, pwai gannya wawinya wijiwaakina, pwai gannya wawinya wijiwaakina sana sana yaka tikuryaba mwaaidei dameri widina 'Nayaa divaihana!' widiwakelyi. Sahibaaibi' yihithima! ³⁵ 'Sarevidaa'nyi nimireihi, nabaai nayaa divaihanaryila! Sare' dare'nesi. Angevine naangerina yawi'na 'Gami gathingaa' bathei dinga!' myawirivanigo. 'Sawisavi bathei dingaka? Kalawawegaa' bathei dingaka? Yirikunyagaa' bathei dingaka? Yirike byaaka gaai yadaaworiyagaa' bathei dingaka? Nemi myawirivanigo,' dapi nayaa divaihanaryila! ³⁶ 'Nimi yime'nyabi' yima'naaba'muji yarai walaabide'na se wa'dapi nayihwangamudi!! ³⁷ Nabaai nimireraji kayaa'na nabai'bhika!' dena yihithivanige sa'na a'mweraavi widivanige 'Nayaa divaihanaryila!' " widina ya' Jizaazai.

"Jizaazai balana!" desa'nesi.

(Matiyui 26:1-5; Luki 22:1-2; Joni 11:45-53)

14 ¹ "Sawita daryaa kajinnoji tika Pari'ma'munne'naji tika munne Girikula liwinya pamidakina myade'naji naadengira," Juyara

dinyina. Sara dinyina kye' sagaa' sipizipiya Gotiyarina mubithika yira'divita naangeraji Juyaraavire Yagaaikiwjaraji dinyina “Nemi lika gavabi' yulyarawaaji wila yirawaaji tamakaade'na sahwari?” dinyina ye!. ²Sare' dare'nesi. Sahwara dina “Tika munne sagaa' a'mwera mala nanerabika! Sagaa' sarina mwaalana!”

A'mwe' Jizaazari wabatirinya winya'ne' dinga'.

(Matiyui 26:6-13; Joni 12:1-8)

³Sai Anga Betaani mwaalaka Saaimoni Samatanakere angevi wilina wapaaya nya'nei walyamwaaidisi a'mwe' wilaabina. A'mwe' simaa'gula nawi'nya wabatirinya naathi tirinya winya'ne mubya naange yake' yi'nikesi makulaabina. Makulaabina yaka simaa'gulya' tingi'na yaka gamire minyaginyavi dingina ya!. ⁴Tivi'na dingina kya' pvara simunyangi sinna tika wida'daa'nyi dinyina “Wabatirinya winya'ne' be'na wasi'niwaka! ⁵Sare' dare'nesi. Wabatirinya sa' kinaaya kwala naanga naanga (yirika 300 wawinya'ne nigwia) mubazi kwaji a'mwe nigwimaayaraavi nigwia kujaavadika!” Dinyina yeva “A'mwemil'gi baa'na yiwaal!” maanga widina. ⁶Maanga mi'na widina kye' Jizaazai widina “A'mwe' mwaalana! Sara baa'na widivanigava! Niminyina tewaanya nawi'nya' nyiwakesira. ⁷Sare' dare'nesi. Sariminyaba yuyagaa' a'mwe nigwimaayara mwaaidivi' 'Wawinya maayaraavi tewaanya wideinyi,' yawirapiyagaa' tewaanya jideihilyira. Wawimaayara yuna mwaaidivi' kiri' nimi sariminyaba yuyagaa' mamwaalyi yideinyira. ⁸A'mwe sa' yanne'na yiwa'. Dahaa' nimore kilaakejiki kanyidingiwa' dividasi wabatirinakeinyi balideinyira. ⁹Nebulya'na yihithiwa. Kwaaka yuyavakaavi yagaala tewaanya' widipi'devakaavi a'mwe' nyinike' gaminyi yawipi'de'na wijiwaakipi'desira.”

Juthaazai da' “Jizaazare yikamaangeraavi widima!”

(Matiyui 26:14-16; Luki 22:3-6)

¹⁰Sagaa' gamire a'mwe ata yuyiraai sivilyiridaasi pvaraalyara mwaaidivi' a'mwe gavei Yizikeriyotiyai Juthaazai wo'nikei mwaaida “Kumi wila yirakipi'de'na widima!” daka sipizipiya Gotiyarine tamira'divita naangeraayawinna wina. ¹¹Mi'na wawaka yagaala widina kya' kumi yilaaya marina yeva “Giminyina nigwia gizavaana!” widina ye!. Mi'na widina kye' yawi'na “Kumi Jizaazari wila yirakipi'de'na nimi gara yideinyaka?” Yawiraka kuna yawi'na ya!.

Jizaazalyi gamireraji tika munne ne'.

(Matiyui 26:17-25; Luki 22:7-14,21-23; Joni 13:21-30)

¹²Munne Girikula liwinya mamilyade' gaai yima'nyina kya' sagaa' Pari'ma'munne sipizipiya diwinyari Juyara tadivisagaa'

gamirera widina “Nemi kwawaaji gimi Pari'ma'munne sipizipiyari dinade'na gava yovirawakaajiwona?” ¹³ Sara widina kye' gamireraari widaasina ya' “Angeba wilakiri a'mwe pwai aalitalya' kinya marina yiwakeri duzima'naawila! Wijima'naawakiri angevi wilaawadevanyari dimidinyila! ¹⁴ Saba angesiyari duzila! 'Gotiyare yagaala wijiwaakadei githivani! “Gavi ku'dika yarinikevi se wa'deva gavanaka? Pari'ma'munnevi nimiji nimirerari naadevanyira.” ¹⁵ Kirimi sara kudakiri gavi ku'dika naanga munyaba yarinikevi neminyine namwaalyitaji taivoliyaji warikevi yhibwaridaakwadevi neminyina wapaaya jowirawakyla!” ¹⁶ Tivi'na widaasina kya' gamireraai wawagila angeba wilaawina yagila dara wanganagilya! “Jizaazai sara nehithiwake dari!” Mi'na yawiragila Pari'ma'munne yuya yovirawakina yagi. ¹⁷ Sawisa' mena kajinna' sahwai gamirerari bina ya'. ¹⁸ Bina kya' wapewakamaranyavina asiraji dihaihi'na yadivi' namwaaidapi Jizaazai widina “Nebulya'na yihithiwa. Sarimijiya pwai niminyina yikamaangera wila nyirakipi'de'na nyimarimwaihadei nimiji wapaa nivanigolyai niminyina yikamaangeraavi widathelyi.” ¹⁹ Sara widina kya' kuminyi kale wiadaa'nyi pwai widina “Nimi daaka? Nimi dingaka?” pwai widina “Nimi daaka?” yuyara sana sana widina. ²⁰ Mi'na widina kye' sahwai widina “Atiraai sivilyiridaasi pwaralyaihilyiya pwalyi girikula maa'gula gavevi diwilavanivanigolyalyira. ²¹ Gotiyare bukuya' dinikabaabisa'na 'A'mweraavine Kaimiraayai barya'nei wawadelyira.' We', a'mwei A'mweraavine Kaimiraayarina yikamaangeraavi widathele! Sara kyoji a'mwe sari ganaange' mamaari yaji kwaji tewaanya kyadi!”

Jizaazai aalya waainiya' girikula wijaava'.

(Matiyui 26:26-30; Luki 22:15-20; 1 Koridi 11:23-25)

²² Kumi nadaapi Jizaazai girikula maaraka Gotiyari wida' “Gimire yaya' makimwa. Su! Su!” Mi'na widaka gunyina gunyina yaka wijaavaka widina “Dimaaryila! Da' nimore kilaakejikira.” ²³ Widaka kaapivananya' maaraka Gotiyari “Su!” widaka wijaavina kya' kumi sara yuyara pwai nyina pwai nyina ye'. ²⁴ Mi'na nyina kye' widina “Waainiya' mi'na niwaasa' yi, wilimwagarikeburine nimore tawe' niwaasasi. Nimore tawe sa' giragire a'mwe kwalaalyaraavina bwalaravadesi. ²⁵ Nebulya'na yihithivanige. Aalya waainiya' girai piwilyawidaasa' ayina manya' muji Gotiyai maremwaaideva waainiya mudike' nidehaa'nanyi. Arikewinyi.” ²⁶ Tivi'na widina kya' yiledaata piri'na deva Mugunya Wolivina kaanna wina ye'.

“Niminyina Pitai 'Maavelyi,' widathelyira.”

(Matiyui 26:31-35; Luki 22:31-34; Joni 13:36-38)

²⁷ Jizaazai widina “Sarimi lika yapi niminyi dinyagalaya'makwideihilyira. Gotiyai dara dinikesi. Sipizipiya yi'divaideri karamaka' muji sipizipiyara

likaanya yiwinadaapi! derera. ²⁸ Sara jide kiri! nimi kabala'muji kanyadikaavoji Galilineinyi sinnawi yihibwaramakwaanideinyi waanidera.” ²⁹ Sara widina kya! Pitai widina “A'mwe yuyara kyagihalya'makwopi nimi aawa!” ³⁰ Jizaazai widina “Nebulya'na githiwa. Sawita dahaasagaa' niminyina 'A'mwe sari mwanganyainyira,' duthatheiginyira. Dahasaai dahaa' kada'gizi kukuraayai yagaala pigasaai dathelyira.” ³¹ Sara widina kya! yagaala diraginna baziwina “Giminyina 'A'mwe sari mwanganyainyi,' maji yiwija! nehiramakipi!deinaalyira. Arikawi.” Gami sara widake! yuyara sara widina ye!

Gazamani saba Jizaazai tibariyagaala wida'.

(Matiyui 26:36-46; Luki 22:39-46)

³² Yaayeba Gazamani wo'nikebanna wina kye! sai gamireraavi widina “Nimi tibariyagaala widadaa'muji dava dalamwaalyila!” ³³ Pitalyi Jemizalyi Joniji saraavi pibanna makuna yaka lika kya! gamire kale dusina ginyiwanna'na kya! ³⁴ kuminyi widina “Nimire kale dusina nyiginyiwanna'mwake' balideinyi dingaka? Dava mwaalapiji divaihanaryi!” ³⁵ Sara widina yaka sangiri'na wawaka kwaakevina wala'na yaka tibariyagaala widina “Daanga nyivinadehaa'na githiwa. Niminyina 'Daanga mavinannera!' diza' daanga nyivinya'ne' myima'nyi yana! ³⁶ Tataai, Nimwai, diraginaangeigi, yuya nayaa yinneiginyira. 'Daanga nuvinadika! Sabwi marasi'nima!' diza' dimarasi'na! Kiri' simunya nimoreburidaasi minnera! Aawa. Ginnyaburidaasi ja!” ³⁷ Ayina baka dara wanganake! “Se dakava!” Daka Pitari widina “Saaimoni, se daki? Maalikegaa' mabaihanarijiwaa? ³⁸ Sarimi tibariyagaala dithavaihanarila! 'Saataani kayaa'na naneyadika!' majaihi 'Nemi nayaa baihanaraana!' kuryaraavi yawi'maniga!. Sarimire kilaakejiki maa'na naanga yihimanike'na se wa'mwaa!” ³⁹ Sara widaka ayina wawaka tibariyagaala widake! ayawidaasi widina. ⁴⁰ Mi'na widina yaka ayina baka dara wanganake! “Se dakava!” Sare! dare'nesi. Kumire tinnya se'na yidaakwe!. Sara kada! kumi dina “Nemi beri' widaaziwona?” deva navika mwaalina ye!

⁴¹ Dahasaai dahaa' yagalaawaka widina “Kwazaaka se wa'manigasaihi daaka? Mi'nanyira. Yithaanyi, dahaa' kyima'niwa! A'mweraavine Kaimiraayainyi tamakya'na pwai kayaa'nanyaraavi malya'neraavi mena wibwaridaakuwaka! ⁴² Dithaayila! Nemi wirata'naana! Yithaanyi, niminyina yikamaangeraavi wibwaridaakwakei yini!”

Jizaazari wila pwiye'.

(Matiyui 26:47-56; Luki 22:47-53; Joni 18:3-12)

⁴³ Sagaa! widadaa'nyi yime'nya'bi! Juthaazai a'mwe atiraai siviliyiridaasi pwaralyarajiya pwai bina. Gotiyarina mubithika

yira'divita naangeraji Juyaraavire Kiwijaraji Juya naangeraji sara widaasina kye! kwala naanga mwaalevera kwaari'masiraminya, kiliyi'gwahaalya limwanna yevera Juthaazalyi bina ye! ⁴⁴Sinnawi saggaa' yikamaangeraavi wibwaridaakwakei wijiwaakakei “Nimi yilaaya mariwijai sahwalai. Nayaa limwagapiji nayaa baihana'divi' dimakwila!” ⁴⁵Sara wijiwaakakei baka yime'nya'bi' gaminyawinna wijimaatavaka widina “Naangeigi!” Tivi'na widaka yilaaya marina ya! ⁴⁶Yilaaya marina kya' aawilasara ata galalimwanna yeva wila yirina. ⁴⁷Wila yirina kye! daavesarajiya Jizaazarei akwai, kwaari'masiraminya' maaraka sipizipiya Gotiyarina Yira'de Naangere yaasiwa'wawinyari yiri'gainyina yaka gamire kadikiki lihiwi'na ya! ⁴⁸Sara kya' Jizaazai malya'neraavi widina “Kuka yipalamaa'dinyainyi daaka! Kwaari'masiraminyaji kiliyi'gwahaalyaji limwanna yeva ‘Yipalamaa'deibisari wila yiraana’ deva davivaniga!” ⁴⁹Gazagaasaggaa' yirikeryaavi Gotiyare Angevi sarimiji mwaaidi yihiziwaakadinyagaa' wila manyiryadivisaihilyi. Aawa. Sa'na kigaakuna Gotiyai dinike' yune'na yima'nana!” ⁵⁰Tivi'na widina kya' gamirera yagalya'ma'na yeva likaanya wina ye'.

⁵¹Miginya akwai kwaabihannya piri'na yewaa'bwa'nakei midinna kya' pwara kwaabihannya' galamwagi'nyina kye! ⁵²kamagaduyivale' kannyimaayai kaanyave'na wina ya'.

A'mwe naangeraayawi Jizaazai mwaala'.

(Matiyui 26:57-68; Luki 22:54-55,63-71; Joni 18:13-14,19-24)

⁵³Jizaazari Gotiyarina Yira'de Naangeryawinna makuna yadaapiji Gotiyarina yira'divita naangeraji Juya naangeraji Juyaraavire Kiwijaraji yi'bwa'nigavina. ⁵⁴Yi'bwa'nigavina yadaapi Pitai menyaba midinaawina yaka Gotiyarina Yira'de Naangere angwaasavi wina kya' damerari mwaaleva dika yimwannyina. ⁵⁵Dika yimwannyina yadaapi Gotiyarina Yira'divita naangeraji kaajoliya yuyarari sara dinyina “Nemi tamakaade'na a'mwera dina ‘Jizaazai kayaa'na yakevi wanganena,’ dipi'dera gawi mwaaihava?” Dinyina kye' kiri' a'mwe sahwaru mamwaalyina. ⁵⁶Sare' dare'nesi. A'mwe pijaakuna gaminyina kwaasi yagaala jalikurakesa' kiri' kumire yagaala avaananya' majasi.

⁵⁷Pwara daavina yeva kwaasi yagaala dara wijalikurakina ⁵⁸“Gami dake' nemi wi'no. Dara da' ‘Gotiyare anga da' a'mwera yavikaryaasa' kayaaka yigala'muji yirika daryaai dariki anga piri' a'mwera mamaji yipi'de' madideinyira,’ sara wi'no.” ⁵⁹Sare kiri' kumire yagaala ge' ge' dina yesa' avaananya' mika.

⁶⁰Gotiyarina Yira'de Naangei tinnyaba daavaka Jizaazari yiwaara'na “Yagaala piri' mama'maa'dinneigi daaka? A'mwe dara jalikurakya aane pibwi kibwi mama'maarijiwaana?” ⁶¹Sara yiwaara'na kya' sahwai yagaala majai aane piri' kiri' marivikiri ya'. Pigasaai Sipizipiya

Gotiyarina Yira'de Naangei yiwaara'na “Kiraazitiyaigi daaka? Gotiyai tewaanaanga yinikere kaimiraayaigi daaka?” ⁶² Sara yiwaara'na kya' Jizaazai widina “Sahwainyira. A'mweraavine Kaimiraayai Gotiyai diraginnakere aangasimagi kamwaloji Gotiyalyi maremwaalyikaderaari danganyidelyira. Nabaai yiraaya sigunyavi wa'dengi gami walaabathelyira.” ⁶³ Mi'na widina kya' Gotiyarina Yira'de Naangeri sinna tika kudava' baazi'ma'nya' maralihivainyina yaka yuyaraavi widina “Nemi tivi'na wi'niwo' gaminyina yagaala jalikurakya'ne pwaraavina nemudaasiwakeina daaka! ⁶⁴ Gotiyarina yagaibirazika diwake' sarimi mi'na wi'niwaava. Beri' dizijiwaa'?” Sara widina kya' yuyara jida'na “Kayaa'nanyabwi yiwake'na balana!” ⁶⁵ Pwara gaminyi maagwala wopwakina yeva gamire sinnyavi bwakakina yeva asilyi gwamwagaranna yeva widina “Gotiyari wi'na'gizi dinejiwaakya! ‘Aai giramwaka?’ ” Mi'na widina kye' damera gaminyi araraalyaji tamamakuna ye'.

Pitai wida' “Sai myawirivanige.”

(Matiyui 26:69-75; Luki 22:56-62; Joni 18:15-18,25-27)

⁶⁶ Kwaakeba angwaasaba Pitai mwaaidi'nyi Gotiyarina Yira'de Naangere wawinya widaayade' baka ⁶⁷ Pitai dika yimwannakeri tinna wanganaka baihana'na ya'. Baihana'na yaka widina “Gimiji Naazareti mwaalyai Jizaazaryaba mwaaidinyaiginyira.” ⁶⁸ Sa' widina kya' Pitai “Nanyirabika!” daka kwaasi widina “Arikawinyi. Gimi nyidiwaanya' myawiryadinyainyira.” Mi'na widaka adikurya savina mwalaawina. ⁶⁹ Mwalaawina kya' widaayade' wanganaka a'mwe yaasiwa'mwaalyaraavi ayahi widina “A'mwe dai kumijiyalyira.” ⁷⁰ Pitai nabaai widina “Arikawinyi.” Divi sagaa' kibawegaa' a'mwe yaasiwa'mwaalyara Pitari ayahi widina “Nebulya'na githiwaka. Kumijiyaginyi. Sare' dare'nesi. Galili mwaalyaiginyira.” ⁷¹ Sara widina kye' yagaala diraginya widina “(Daaina!) Gotiyaryaba nebulya'nanyasira. Kwaasiya'na mika! Sarimi diwaata a'mwe sari mwanganyadinyainyira.” ⁷² Mi'na widina kya' yime'nya'bi' kukuraayai yarai pigasaai dina ya'. Dina kya' Pitai yawi'na ya' “Jizaazai sara nyidiwa' ‘Kukuraayai pigasaai jaka maji kyoji niminyina dahasaai daha' julyakideiginyi.’ ” Pitai sara yawiraka “ ‘Jizaazareinyi mika,' be'na widiweinyaka!” kale kwia' kinna baziwilaawina ya'.

Paailatimyaba Jizaazai daava'.

(Matiyui 27:1-2,11-14; Luki 23:1-5; Joni 18:28-38)

15 ¹ Mwanyagaa' yirike' gaai pu'daa'nyi yime'nya'bi' Gotiyarine tamira'divisaraji a'mwe naangeraji Juyaraavire Kiwijaraji kaajoliya pwaraji sara gaminyina jamungajina. Mi'na jamungajina yeva

Jizaazari wila pwiya, Ga'maaniyai Kwaaka Juthiya maremwaaide Paailatimyawinna makuna yeva sari marimwaaihina. ²Marimwaaihina kye! Paailati gaminyi yiwaara'na “Juyaraavi maremwaaidinyaigi kingiyaigi daaka?” Yiwaara'na kya! Jizaazai widina “Gimi nyidiwaanya' nebulyasi.” ³Sara widina kya! Gotiyarina yira'divita naangera “Gamire kayaa'na yade sanna Paailatimi wijiwakaana!” deva kwaasi yagaala kwalaalya wijiwaakina. ⁴Mi'na wijiwaakina kye! Paailati ayina yiwaara'na “Tivikita piri' kiri' ja'nadina jitheigi midaaka? Yithaa, giminyina kayaa'nanya kwalaalya nyijiwakiwaasange!” ⁵Yiwaara'na kya! Jizaazai yagaala aane piri' kiri' majai mwaalake'na Paailati atika maru'na'na ya'.

“Jizaazai balana!” wide'.

(Matiyui 27:15-26; Luki 23:13-25; Joni 18:39-19:16)

⁶Kwazaaka naanga munne yanyagaa' yuyagaa' Juyara Paailatimi widadivisare “Ayabaaibi' kalavuzari yunakaanya duthaasa!” Sara dinike'na Paailati sara yakelyi. ⁷Sagaa' a'mwera kwaakevaki maremwaaidivisaraavi mala bwa'daaveva a'mweraavi karamake' naangera kalavuzangevi wimwaaihina. Kalavuzangevi wimwaaiheta pwai Baaravaazai wo'nikei mwaalina. ⁸Mwaalina kya' kwala naange' beva Paailatimi gaai widina “Dahaa'na neminyina ayina yiyabwi yaginya' sara ja!” ⁹Widina kye! Paailati widina “A'mweihi, Juyaraavi maremwaaideri wila yaarijiwa?” ¹⁰Sare' dare'nesi. Paailati dara yawirakelyi “A'mwe kwalaalyara Jizaazari yilaaya wimariwaasa'nanyi. Gotiyarina yira'divita naangera tiganaarya yadivi' kotiyavi mariwimwaaihina yiwaava.” ¹¹Mi'na widina kya! Gotiyarina yira'divita naangera kwala naangevi wijiwirina “Jizaazai wamaryana! A'mwe Baravaazari nejaavana!' yarai duzila!” Sara wijiwaakina kye! sara yina. ¹²Mi'na yina kye! Paailati ja'nawidina “Nyidiwaasa'na 'A'mwe sai Juyaraavi maremwaaidela,' dadivisarina gara yijiwa?” ¹³Widina kya' ayina jaka danganna “Yisaviri tamakya'na niliya diramo!” ¹⁴“Baa'nevaka? Be kayaa'nanya yiwakalaka?” Sa'na widina kya' kwala bwa'naanya' jaka naanga danganna “Tamakya'na yisaviri niliya diramo!” ¹⁵Sara danganna kye! Paailati “Kwala bwa'naanya niminyina yilaaya yipika!” daka Baravaazari wila yaaraka dameraavi widina “Jizaazari wila nilinakebaalyi tamapiji yisavi niliya jeramyila!”

Aawilasara Jizaazari birala ye'.

(Matiyui 27:27-31; Joni 19:2-3)

¹⁶Kwaaka Juthiya maremwaaide angwaata Piraitoriyami (koti ange!) wo'nikewinna damera Jizaazari jivwaramakwaweve aawilata yuya pwaraavi jaka jivwaramaa'na. ¹⁷Jaka jivwaramaa'na kye! yuyara yikabeve “Jizaazai

kwaasikingiyai yima'nana! Birala yaana!” deva kingiyivita wayaake' egwevi marajikireva wila lannakesi ghipaleva gamire minyaginyavi maramwaaihi'na. ¹⁸Maramwaaihi'na yeva biralya'na widina “Naangeigi, Juyaraavi maremwaaidinyaigi yuyagaa' dimwaaideigine!” ¹⁹Sara widina yeva yisarisi minyaginyavi tamina yeva gaminyi maagwala wopwakina yeva “Naangelyira,” kwaasiya' deva kwadaai gile'. ²⁰Biralya' sara yina yeva yivita wayaake' mararaakurasi'neva gamire baazi'ma'nya' marajikireva “Yisavi niliya wiramaana!” deva jivwaramakuna ye'.

Yisaviri Jizaazari niliya yerame'.

(Matiyui 27:32-44; Luki 23:26-43; Joni 19:17-27)

²¹Tusavi Saaimoni Anga Saairini mwaalyai, Alekizaadalyi Rupaazalyi saraari kirinimaangei wawinyabadaa'nyai Jeruzaaleminei wirata'nyina yeva aawilasara naanga widina “A'mwe sare yisa' dimakilaawa!” Mi'na naanga widina kye' Saaimoni yisa' makilaawina. ²²Makilaawina yadaa'nyi Mugunya Golihotabanna Jizaazari wijivwaramakuna. Golihota “Gileminyaginyabanna,” dinikesi. ²³Saba “Daanga naanga nuvinadika!” deva aalya waainiyavi kiwata miriya wo'nike yikeva “Da' dinana!” widina kye' “Aala!” widina. ²⁴“Aala!” widina kya' aawilasara Jizaazari maareva yisavi niliya wirameva “Gamire yivita baazi'ma'nya saza japalaana! Saatuya yawaaji ata gilyavi wanganawaaji japalamakwawaana!” deva saatuya yeva gamire baazi'ma'nya jaapaina. ²⁵Sagaa' yisavi niliya wiramesagaa' mwanayavi naaini kilokiyagaakira. ²⁶Tamakya'ne pikarya “Kingiyai Juyaraavire maremwaaidei,” yidaveva yisavi munyaba yilakina. ²⁷Yilakina yeva gamire aangasimagi a'mwe pwari kwanaamimagi pwari niliya wirame' kuka yipalamaa'disaraari. ²⁸Sa'na wiramina kye' sagaa' Gotiyare bukuya' dinike' yuneba yima'na'. Yagaala sa' “Kayaa'nanyaraavi sara yipi'de' gaminyiji sara yipi'delyira,” dinikesira.

²⁹A'mwe a'mwera wawilavesa kunya minyaginyara winaangi'nyi winaangi'nya yadaapi birala dara wina. “A'a! 'Gotiyare Angevi kayaaka yigala'mwi yirika dawaai dasangi mamwineinyi,' nedahinyaigi, ³⁰sahwaigi gimi saigi gaimwanna'gizi niliya lawasi'na'gizi yisavidaa'nyi dalaama! Divadaihasamaa'nana!” ³¹Sara birala widina kye' nabaai sabaabi' Gotiyarina yira'divita naangera Juya yagaai'kiwajaraji Jizaazarina birala dine' “Pwaraavina diraginna padaihasamaarakela! Gami sawai padaihasamaa'nannele! ³²Kiraazitiyai Yizireliyaraavi maremwaaidei kingiyai yisavidaasi kwalaabozi wanganawaaji gaminyi nayaa limwagaraade'nanyi.” Birala sara dinyina kye' gaminyawi pwaraai niliya wiramesaraai birala widina yagi.

Jizaazai bala'.

(Matiyui 27:45-56; Luki 23:44-49; Joni 19:28-30)

³³Sirigwajahaa' kyima'na' kwaakeva' yuyava' yirika kigaa' jihinya' jinnaka tiri kilokiyagaa' jihinya' mi'na jinnakegaa'nanyi. ³⁴Sagaa' tiri kilokiyagaa' Jizaazai

jaka naanga gannya yagaalya' danganna “Eloi, Eloi lama savakitaani.” Yagaala sa' aangyagaala “Nimire Gotiyaigi, nimire Gotiyaigi be'na nyagalya'ma'mwaana?”
³⁵ Jaka sara danganna kya' saba daaveta pwara wi'neva dinyina “Yithaanyi, Yilaajari jaka widiwaka.”³⁶ Dinyina kye' pibanna pwai kaanyave'na wawaka aalya waainiya yirikevi saalaalyaviya ji'minya' marapaihaka aalinake' yisarikire sinnyariki wakaka “Aalya' nana! Pizi'gwa mwaalana!” daka makilaawaka pwaraavi widina “Kavaayila! Yilaajai bozi yisavidaasi makwalaabaza' wanganaadera.”³⁷ Widina kya' Jizaazai jaka naange' widaka simudinya yinahu yeki'na ya!

³⁸ Gotiyai Gotiyare Angevi janne naange' jiki'nike' munyabadaasi kwaakewinna kayaaka dabura' yuneba. ³⁹ Jizaazari niliya tameta yisavi aawilata naangei Anga Romi mwaalyai maredaavakei dara wanganake' “Sara davaimwaka!” Daka widina “Nebulyasira. A'mwe dai Gotiyari gawaalivaangelyira.”⁴⁰ Widadaa'nyi keiba a'mwe daaveva tinna wanganna. A'mwe sa, Maariyaa' Maahithaala mwaalyasi Maariyaa' Jemizai diviyalyi Jozizalyi kidaraari kirinaangesi Saalomiyasi sa
⁴¹ Jizaazai Kwaaka Galili mwaalakegaa' kaanya ye'mwannayamaryeva wapaaya aalya wijaavesaji a'mwe piniji Jizaazalyi Anga Jeruzaalemina yilaabeta a'mwe piniji sangyineba mwaalina yeva tinna wanganna ye'.

Jizaazari likyirake'.

(Matiyui 27:57-61; Luki 23:50-55; Joni 19:38-42)

⁴² Sawisaburi kyima'na' Jozepiyai Aarimathiya mwaalyai bina.
⁴³ Bina yakei a'mwe tewaanyai Kaajoliyai saggaa' Gotiyai Kwaaka yuyavaki maremwaaidehaa'na kave yemwaalakelyi. Jizaazai balakegaa' Piraaidehaa' Jozepiyai “Kwazaakegaa' gilaayai enana naribainadika!” daka Juyaraavire Kwazaakegaa' yovira'daapiyagaa'na diraginna yivaimwanna yaka Paailatimyawinna baka Jizaazare kilaakejikina widina “Gilaayai walyamarirakima! Nyimaryaama!”⁴⁴ Sara widina kya' Paailati maru'na'na “Ai, dahaa' mi'na davalika?” daka aawilata naangerina jiwaramaa'na. Sara jiwaramaa'na kya' naangei kulaaba' yidaanganna “Jizaazai mena baimwakei daa'?”⁴⁵ Yidaanganna kya' sai “Yo. Mena baimwa!” widina kya' Jozepiyari widina “Wikira. Gilaayari dulamaraawa!”⁴⁶ Sara widina kya' Jozepiyai wawaka kwaabiyivita saamina yaake' mubyawalyaadikei yisayabanna baka gaminyi makwalaabaka yaakesi yewa'mwagapwiyaka makulaawaka kavi'ninnyavi simaangevi lilividaakunikevi wilakaka sila naangei simaangevi tihirakina ya'.
⁴⁷ Jozepiyai sara yadaa'nyi Maariyaa' Maahithaala mwaalyasi Maariyaa' Jozizari ganaangesi gamire wakya'neba tinna wanganna yagi.

Jizaazai baryai ayina dikaava'.

(Matiyui 28:1-8; Luki 24:1-12; Joni 20:1-10)

16 ¹ Kwazaakegaa' mi'na kwavilava' Maariyaa' Maahithaala mwaalyasi Maariyaa' Jemizari ganaangesi Saalomiyasi sa “Nemi

Jizaazare kilaakejiki puraana!” deva marazinanya wabatirinnake! mubina. ²Mena mubina kye! Saadehaa! mwananyi yirike! gaai pu'daa'nyiyagaa' simaangevine a'mwe kaanna wina. ³Kaanna kuna wina yesa dinyina “Silaangei kavi'nimaangevi warikeri neminyina aai baasadelaka?” ⁴Sara dineva maranganna yadivi! dara wanganesa! “Ai, silyai mena davaasinika!” Sare! dare'nesi. Sila sai wapeminnakei warakelyi. ⁵Mi'na deva simaangevi wilaawina yeva kuminyi aangasimagi miginyai kwaabihannya yaaka nawi'nya' yira'nakeri tinna wanganna. Tinna wanganna yeva lika yina yeva atika maru'na'na. ⁶Atika maru'na'na yadaapi miginyai widina “Lika mipinera! Jizaazai Naazareti mwaalyari yisaviri niliya wiramwa'daasarina bi'manigava. Sara yawi'mwa. Kyidikaa'mwa! dava mamwaalyika. Yithaanyi! Wakiwa'daasaba danganyila! ⁷Sare kiri! wawopiri gamireraji Pitalyi saraavi duthaawila! ‘Sinnawi Kwaaka Galili kwaana'muji sarimi nyimidinaabyidera! Mi'na yihithevaabi' saba dinyanganyideinyira,’ sahwai sara nyidiwa!” ⁸Sara widina kya' simaangeyabadaa'nya kaanyave'na walyaweve likaanya wina. Sare! dare'nesi. Bi'bita yadivi! lika yeva simunya nayaa myawiri. Likaanya wina yeva aane pwari kwari aane pirivi kirivi muji ye! Sare! dare'nesi. Lika naanga wiake'na sahini kunna marinaawina yesangi.

Maariyaa' Maahithaala mwaalya' Jizaazari wangana'.

(Joni 20:11-18)

⁹Saadehaa' yirikunyagaa' Jizaazai dikaavaka sinnawi Maariyaa' Maahithaala mwaalyavidaasi yimaka ati ata puridaa'nyi pwaraalyaraavi marasi'nakevi gaminyina wijiwaaina'.

¹⁰Wijiwaainakegaa' a'mwe sa' wawaka gamijiyara yikwaraamaya dadaapiyaraavi buthina “Jizaazai kwaihwainakei mwaaidi'nyi wangamwerinera.” ¹¹Sara kadika wi'neva “Kwaasi yagaala nediwaka,” dinyina yeva sa'na malimwagi ye'.

Gamireraai Jizaazari wanganagi.

(Luki 24:13-35)

¹²Sara yina yesagaal'daasi a'mweraai wawinyanneba kaanya kyamaryagi sahwai mudikeibisai wilaabaka pigasaai wijiwaaina'. ¹³“Jizaazalyi,” sara yawiragila ayina wawagila gamire pwaraavi widina kyagi sahwaraare yagaalya'na “Kwaasiya',” dinyina yeva sa'na malimwagi ye'.

Jizaazai gamireraavi wijiwaaina'.

(Matiyui 28:16-20; Luki 24:36-49; Joni 20:19-23)

¹⁴Dividaa'nyi angevi gamirera atiraai yaka sivilyiridaasi pwaina sarera wapaaya tika nadaapi sahwai wilaabaka gami mena dikaavakeri

pwara tinna wanganeva gamire pwaraavi widesa' malimwagyesa'naji simunya myawiryesa'naji maanga widina. ¹⁵Maanga mi'na widaka widina “Yuyabanna Kwaaka yuyavakina wawopiji yagaala tewaanya' Gotiyai wakyaaka yuyaraavi duziwaakyideihilyira. ¹⁶Savine'na pwai kanyilimwagaroji aalyavi bavitaaziya kyapi Gotiyai kayaa'nanya marasi'nada padaihasamaaradelyi. A'mwe pwai manyilimwagaryoji gannya kayaa'nanya yinahu waragothengira. Sahwari jidavadelyi. ¹⁷A'mwera kanyilimwagarapi wijiwaainya dara yima'nade. Nimore diraginya' maarapiji niminyine yayavi yimakeraavi a'mweraavire munyikaavidaasi widaasipi'de. Nabaai Maaveraavire yagaala widipi'de. ¹⁸Naawinaanyari maarapiji aalya nabaidivisa' napiji mabalyi yipi'de. Arikawinyira. Nabalinakengire minyaginyangi ata kadathiwagapiji nabalinake tewaanya mwaabi'de. Sara yima'nipi'dengira,” widina ya'.

Jizaazai Gotiyarebannei Sigunyavina yilaawa'.

(Luki 24:50-53; Apozelijara 1:9-11)

¹⁹Sarevidaa'nyi mi'na widina yakegaa' Gotiyai Naanga Jizaazari makilaawina. Sara makilaawina kya' Gotiyareba Sigunyavina Jizaazai yilaawaka Gotiyare aangasimagi walamwaaina. ²⁰Mi'na walamwaaina kya' gamirera waweve yuyaba wijiwakadaapiji Naangei wigaimwaga'. Kugaimwaga' gamiji nawi'nya kye' a'mwera tinna wanganya'nera dara wija'na “Yagaala sa' Gotiyaresira,” sahwai wijiwaainya ya'.